

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
NOV 1 6 1941

T9299/8/25(14)

列國譜系門十三

十四

古國篇六

周後國章一

列國譜系門十四

古國篇七

周後國章二

列國譜系門十五

古國篇八

古帝王後國章

學海君道部世系類

學海君道部卷之三十二

世系類

列國譜系 卷十三

周後國章

虞

史記曰吳仲雍太伯之弟太伯君於吳無子而仲雍繼立三世至

周章

詳前卷  
吳章

武王克殷求太伯仲雍之後得周章周章已君吳因

而封之乃封周章弟虞仲於周之北故夏墟列為諸侯

索隱曰左傳云太伯虞仲太王之昭則虞仲是太王之子又論

語稱虞仲夷逸隱居放言是仲雍稱虞仲今周章之弟亦稱虞

仲蓋周章之弟字仲始封於虞故曰虞仲則仲雍本字仲而為

哈佛大學漢和  
圖書館珍藏印

吳之始祖後代亦稱虞仲所以祖與孫同號也夏都安邑虞仲都太陽之虞城在安邑南故曰夏墟

路史曰武王封仲雍之曾孫於夏墟爲西吳亦曰虞仲今陝之平陸東北六十里故虞城也漢太陽地有虞山虞井本帝舜之後國所謂西虞十二世而晉滅之

左傳桓公十年初虞叔有玉虞公求旃弗獻旣而獻之又求其寶劍叔曰是無厭也無厭將及我遂代虞公故虞公出奔共池

春秋僖公二年夏五月虞師晉師滅夏陽

左傳晉荀息請以屈產之乘與垂棘之璧假道於虞以代虢虞公許之且請先伐虢宮之奇諫不聽遂起師夏晉荀息里克帥師會虞師伐虢滅下陽先書虞賄故也

公羊傳虞微國也曷爲序乎大國之上使虞首惡也曷爲使虞首惡虞受賂假滅國者道以取亾焉其受賂奈何獻公朝諸大夫而問焉曰吾欲攻郭則虞救之攻虞則郭救之如之何願與子慮之荀息曰請以屈產之乘與垂棘之白璧往必可得也於是終以往虞公見寶許諾宮之奇諫曰唇亾則齒寒虞郭之相救非相爲賜則晉今日取郭而明日虞從而亾耳君請勿許也虞公不從其言終假之道以取郭還四年反取虞虞公抱寶牽馬而至獻公謂荀息曰寶則吾寶也雖然吾馬之齒亦已長矣蓋戲之也夏陽者何郭之邑也曷爲不繫子郭國之也曷爲國之君存焉耳

穀梁傳非國而曰滅重夏陽也虞無師其曰師何也以其先晉

不可以不言師也其先晉何也為主乎滅夏陽也夏陽者虞虢之塞邑也滅夏陽而虞虢舉矣虞之為主乎滅夏陽何也晉獻公欲伐虢荀息曰君何不以垂棘之璧屈產之乘而借道乎虞也公遂僭道而伐虢公之奇諫曰晉國之使者其幣重而辭卑必不便於虞虞公弗聽遂受其幣而借之道宮之奇諫曰唇亡則齒寒其斯之謂歟挈其妻子以奔曹獻公亡虢五年而後舉虞荀息牽馬操璧而前曰璧則猶是也而馬齒加長矣

胡傳孟子晉人以垂棘之璧與屈產之乘假道於虞以伐虢宮之奇諫百里奚不諫然則晉人造意以虞首惡何也貪得重賂遂其強暴滅兄弟之國以及其身而亡其社稷所以爲首乎國一而曰滅夏陽邑耳其書滅何也夏陽虞虢之塞邑猶秦有潼關

蜀有劔嶺皆國之門戶也潼劔不守則秦蜀破夏陽旣舉而虞虢亡矣春秋此義以天下爲家以城郭溝池爲固以山川丘陵爲險設之以守國而待暴客者也其衰世之意耶

張氏曰晉武公以曲沃伯篡晉獻公嗣位侵以兵吞噬遠地之小國晉與虞虢爲隣自莊公末因虢人侵晉而謀於士蒍曰以圖虢今始與虞伐之蓋先以重賂賄虞虢之交虞人不知其謀反道晉以滅下陽下陽者控制虞虢之要地晉取下陽而二國舉矣故春秋於此書滅以虞首兵如邾之道鄭所以見虞之自取滅亡也

高氏曰不曰虞人晉人而曰師者著其恃衆以凌雪也取邑而言滅者下陽虢之所係下陽取而虢亡不待殞其社稷也

趙氏曰公羊云曷爲國之君存焉耳若在下陽受兵何得不見擒乎穀梁云虞無師以其先晉而言師按經云虞師安得謂無師乎

僖公五年冬晉人執虞公

左傳晉侯復假道於虞以伐虢宮之奇諫曰虢虞之表也虢亡虞必從之晉不可啓寇不可翫一之謂甚其可再乎諺所謂唇亡齒寒輔車相依唇亡齒寒者其虞虢之謂也公曰晉吾宗也豈害我哉對曰太伯虞仲太王之昭也太伯不從是以不嗣虢仲虢叔王季之穆也爲文王卿士勳在王室藏於盟府將虢是滅何愛於虞且虞能親於桓莊乎其愛之也桓莊之族何罪而以爲戮不惟偏乎親以寵偏猶將害之況以國乎弗聽許晉使

虞之奇以其族行曰虞不臘矣在此行也晉不舉矣矣八月甲午晉侯圍上陽問於卜偃曰吾其濟乎對曰克之公曰何時對曰童謡云丙之辰龍尾伏辰均服振振取虢之旂鶉之賁賁天策焯焯火中成軍虢公其奔其九月十月之交乎丙子旦日在尾月在策焯火中必是時也冬十二月丙子朔晉滅虢虢公醜奔京師師還館於冀遂襲虞滅之執虞公及其大夫井伯以勝秦穆姬而修虞祀且歸其職貢於王故書曰晉人執虞公罪虞且言易也

胡傳公羊子曰虞已滅矣其言執何不與滅也滅者亡國之善辭上下之同力也若夫虞公地之蘊於晉久矣晉命行乎虞民信矣其曰晉人執之者猶衆執獨夫耳其曰公者非存其爵猶

下執之之詞也不言以歸驗其爲匹夫之實也書滅下陽於始而記執虞公於後可以見棄義趨利瀆貨無厭之能亾國敗家審矣

汪氏曰下陽不當書滅而書滅虞當書滅而不書滅蓋下陽者虞虢之扞蔽下陽旣取則虞虢亾故書虞師同晉滅下陽者著虞之自滅也書執虞公而不言滅者以虞之滅不待此時也不言以虞公歸則虞公特亾國之君耳或謂春秋不當沒晉滅虞之罪夫聖筆之立義如化工之生物安可拘拘於常例哉如梁亾而不書秦滅胡髡沈逞國未滅而書滅皆變其常法也或曰虞公嘗爲天子之三公故稱公執天子三公其罪重於三公故不言滅虞特書晉執而貶人之

黃氏澤曰林氏曰三傳謂虞虢爲諸侯愚以爲非夫當時諸侯無小大遠近皆與魯有朝聘之交喪葬之及與盟會征伐虞虢若實諸侯安得六十餘年未嘗有事書于經乎周封諸侯唯宋以王者之後得封公其他雖周公太公之子亦不過侯爵虞公安得特封公乎凡國名必取之於其地今云虞者獨取於其字豈諸侯乎然則虞公者何人耶曰天子三公如周公祭公之類也虢君亦然雖於經無見然左傳謂之虢公醜則又何以知其非諸侯乎凡經書滅國必曰滅某國奪邑則曰取某邑虢實列國則何不云滅國而曰滅下陽乎故知下陽者虢公之采地非國也不曰晉取者天子之地非諸侯所得取故云滅使若國然故虞亦不云滅而但云晉人執虞公聖人意者不忍周室之衰

諸侯再取其地故不斥言而微文以見意猶王敗於鄭而經乃云陳人蔡人從王伐鄭與茅戎戰而敗經不書戰而云敗績於茅戎之類也前書虞師晉師滅下陽者罪虞爲首惡也此書晉人執虞公見晉執天子之三公不道之甚矣

卮言曰黃氏云虞虢非諸侯此說非也左傳云太伯虞仲太王之昭也虢仲虢叔文王之穆也孟子百里奚虞人也晉人假道於虞以伐虢百里奚知虞公之不可諫而去之齊夫周道親親同姓亦皆有國豈以太王王季近屬而無封國乎使非諸侯何以有大夫乎周初分封在畿內者亦只是食采入爲王臣謂之內諸侯如周祭之類皆是嘗爲三公故稱公然愚以爲虞虢之稱公或亦爵也王者之後封公太王王季已追王矣虞虢非其後哉地近而邑微國小而爵崇周制如此

劉氏曰左氏云晉襲虞滅之而修虞祀且歸其職貢於王故書曰晉人執虞公非也虞晉同姓滅之大罪也雖其自取欲文飾修祀歸貢不足以掩其大惡矣

史記曰自太伯作吳五世而武王克殷封其後爲二其一虞在中國其一吳在夷蠻十二世而晉滅中國之虞中國之虞滅而夷蠻之吳興

卮言曰按志今河南虞城縣

安陽

風土記曰武王封周章小子斌於無錫安陽鄉今常之無錫有安

陽山



樊

詩大雅烝民曰天監有周昭假於下保茲天子生仲山甫

孔氏曰周語稱樊仲山甫諫宣王立魯戲與料民是山仲為樊

國之君也樊邑在東都畿內

集註曰仲山甫樊侯之字也宣王命樊侯仲山甫築城于齊

國語曰魯武公以括與戲見王王立戲樊仲山甫諫曰不可

左傳莊公二十九年冬樊皮叛王三十年春王命虢公討樊皮夏

四月丙辰虢公入樊執樊仲皮歸於京師

又昭公二十二年王子朝作亂王子還與召莊公謀曰不殺單旗

不捷與之重盟必求背盟而克者多矣樊頃子曰非言也必不克

路史曰虞仲之支孫曰仲山甫為周卿士封於樊今京兆杜陵有

樊鄉樊川昔惠王使虢公伐樊執仲皮者王符以為封南陽在南

雖州記荊州圖副摯虞等皆以為襄之鄧城然充之瑕丘亦云樊

仲皮國吉甫之墓則在南皮亦作鄧

卮言曰樊自穆仲之後有樊仲皮既以叛而執歸京師矣景王

時又有樊頃子齊或削其爵而不滅其祀也

邦

大鹵

發繇

路史曰以上皆虞之分采

堂谿

史記昭公三十一年楚敗吳於稷吳王闔閭弟夫槩敗亾歸自立

為王闔閭引兵士楚歸擊夫槩夫槩敗奔楚封之堂谿號堂谿氏

司馬彪曰汝南吳房有棠谿亭

舒

史記吳王僚十三年使公子蓋餘燭庸以兵圍楚之六濇聞公子光弑王僚自立乃以其兵降楚楚封之於舒

索隱曰左傳吳子使徐人執掩餘使鍾吾人執燭庸二公子奔楚楚于大封而定其徙無封舒之事當是舒徐字亂又且疎略也

虢

國語曰虢仲虢叔文王母弟也又曰文王詢於八虞諮於二虢

左傳曰虢仲虢叔王季之穆也爲文王卿士勲在王室藏於盟府竹書懿王二十一年虢公帥師北伐大戎敗逋夷王七年虢公帥師伐太原之戎至于兪泉獲馬千匹厲王三年淮夷侵落王命虢

公長父伐之不克宣王十五年王賜虢文公命

史記宣王不籍千畝虢文公諫曰不可王弗聽

賈逵曰文公虢仲之後爲王卿士

韋昭曰文公虢叔之後西虢也宣王都鎬在畿內也

又曰幽王以虢石父爲卿用事國人皆怨石父爲人巧佞善諛好利王用之又廢申后及太子也

竹書幽王七年虢人滅焦十一年大戎入宗周弑王申侯立宜白于申虢公翰立王子余臣于攜是爲攜王後爲晉侯所弑王平元年鄭人滅虢

左傳隱公元年鄭人以王師虢師工年鄭武公莊公爲平王卿士王貳於虢

鄭伯怨王王曰無之故周鄭交質三月平王崩桓王立周人將畀  
虢公政四月鄭取成周之禾故周鄭交惡五年曲沃叛王王命虢  
公伐曲沃而立哀侯于翼八年夏虢公忌父始作卿士於周十一  
年鄭伯以虢師伐宋大敗宋師桓公五年王奪鄭伯政鄭伯不朝  
王以諸侯伐鄭王爲中軍虢公林父將右軍蔡人衛人屬焉周公  
黑肩將左軍陳人屬焉王卒大敗祝聃射王中肩七年曲沃伯誘  
晉小子侯殺之八年冬王命虢仲立晉哀侯之弟緡于晉九年虢  
仲芮伯梁伯荀侯伐曲沃十年虢仲譖其大夫詹父於王詹父有  
辭以王師伐虢虢公出奔虞十五年桓王崩莊王立莊公十三年  
莊王崩僖王立十五年曲沃滅晉十六年王使虢公命曲沃伯以  
一軍爲晉侯是爲武公十七年僖王崩惠王立晉武公卒獻公嗣  
虢公晉侯朝王王饗醴命之宥皆賜玉五穀馬三匹非禮也十九  
年秋五大夫奉王子頹以伐王不克出奔衛衛師燕師伐周立子  
頹二十年鄭伯和王室不克遂以王歸處於櫟見虢叔曰盍納王  
乎虢公曰寡人之願也二十一年夏同伐王城殺王子頹及五大  
夫五月鄭厲公卒七月王巡狩虢公爲王宮于珙王與之酒泉鄭  
伯之享王也王以后之盤帶予之虢公請器王與之爵鄭伯由是  
始惡於王冬王歸自虢二十六年秋虢人侵晉冬虢人又侵晉二  
十七年晉侯將伐虢士蒍曰不可虢公驕若驟得勝於我必棄其  
民無衆而後伐之三十年樊皮叛王王命虢公討執之閔公二年  
春虢公敗犬戎於渭汭舟之僑曰無德而祿殃也殃將至矣遂奔  
晉僖公二年晉荀息請以垂棘之璧與屈產之乘假道於虞以伐

虢遂滅下陽秋虢公敗戎於桑田晉卜偃曰虢必亡矣亡下陽不懼而又有功是天奪之鑑而益其疾也必易晉而不撫其民矣不可以五稔五年冬晉復假道以伐虢十二月丙子朔晉滅虢虢公醜奔京師

卮言曰虢自文公之後世秉周政而皆為小人幽王時為卿士而道王廢申后及太子者虢石父也桓王時為卿士而與鄭爭政致鄭伐王者虢忌父也僖王時為卿士而為曲沃請命者虢林父也夫虢初立晉侯矣而又命曲沃為晉侯繼與晉侯朝王矣而又再侵晉傾儉反覆世濟其凶宜晉獻之汲汲焉而欲滅之也

皇覽曰虢公冢在河內溫縣郭東濟水南大冢是也其城南有虢公臺

古

路史曰南虢上陽是也今虢之虢略正曰南虢以其仲後所都攷亦號西虢上陽城在陝縣之硤石鎮西三十六里常陽驛之東南下陽即今同之下陽服氏亦云在此下夏字通杜謂河東大陽非也馬融云叔封上陽仲封下陽疏謂二地皆虢邑不得二人分封其處九域志云周封虢仲於此世紀三虢仲為西虢不在此也春秋公子譜上陽虢叔之封亦非

小虢

史記秦武公十一年滅小虢

路史曰仲之封為西虢在岐今鳳翔虢縣東遷之際自此之上陽為南虢或云叔之上陽非也其處者為小虢秦滅之亦俱曰郭公

羊傳曰虞郭郭寃碑言郭叔禮記注虢或為郭在武都南百里有虢城

虢城  
虢言曰按志今陝西寶雞縣

東虢

路史曰叔之封制也今鄭之滎陽有虢亭臺家在焉世紀以成臯為東虢叔之封故通典洛之以汜水為東虢國卽制邑左傳云制巖邑也虢叔死焉制今在孟之汜水漢之成臯左疏亦云東虢制也賈逵虞翻等謂叔為西虢仲為東虢誤

庖言曰按志今河南陝州

北虢

路史曰世紀二虢一曰北虢今陝治西四十五里故虢城是也是

為大陽漢志云弘農陝故虢國也北虢在大陽東虢在滎陽西虢在雒按陝平陸皆漢之大陽地天寶元年守李齊物開漕得古鐔有平陸字改焉佑以此為仲邑仲後也

夏陽

路史曰叔為東虢平王奪地與鄭楚莊責王乃求其裔孫序封之陽曲曰郭公晉滅之今陝之平陸卽夏陽也而漢夏陽城又在韓城東北百三十

羅氏曰滅國曰滅君死其位曰滅經書滅國矣或曰虢邑非也虞虢之亾不書而書下陽之滅于此罪虞也下陽虞虢之所恃下陽滅而虢去虢去而虞舉矣滅夏陽者晉而以虞首兵賄也虞之賄孟子反三傳矣

郭

春秋經莊公二十四年冬赤歸於曹郭公

公羊傳曰曹無赤赤蓋郭公也郭公者何失地之君也

羅氏曰管子書云齊桓公游於郊見亾國之城焉訪諸野耆郭氏之虛也公曰曷其虛對曰善善惡惡公曰固政之徵也奚而虛曰惟善善而不用惡惡而不去也故春秋書郭亾猶梁亾者言其所自取也賈誼書作虢君亦曰郭新序乃北燕之地寰宇記云聊城今有郭城博州圖經云亾國郭氏之虛是也管子亦春秋地名云虢北燕之地與齊接境與四虢不相及諸家皆不知郭公繆文余稽四虢先後南北知郭公之非是而世莫知明也故并及

盧氏

路史曰盧氏地道記郡國志皆云西虢之別

岑

路史曰文王異母弟輝之子岑封於岑今梁虢北岑亭風俗通云

古岑子國

右王季之後

管

國語富辰曰管蔡成霍魯衛毛聃告讎曹勝畢原豐荀文之招也史記曰文王正妃曰太姒有子十人長曰伯邑考次曰武王發次曰管叔鮮次曰周公旦次曰蔡叔度次曰曹叔振鐸次曰成叔武次曰霍叔處次曰康叔封次曰冉季載武王克殷封功臣昆弟于是封叔鮮於管封叔度於蔡二人相紂子武庚祿父治殷餘民武

王崩成王少周公攝政管叔與蔡叔疑周公不利於成王乃挾武庚以作亂周公承王命伐誅武庚而殺管叔管叔誅死無後

周書曰管叔經死囚蔡叔

杜預曰蔡放也管叔初亦為蔡放云文王惠慈二蔡

羅氏曰周公蔡蔡而辟管爰代以中旄管故不嗣其後有管敬仲相齊桓公

括地志曰鄭州管城縣今州外城即管國城是叔鮮所封國也

路史曰今鄭治管城古中牟也自漢為中牟隋開皇十六年為管州大業三年為鄭州武德三年復為管貞觀元年復為鄭州

成

史記曰成叔武其後世無所見

春秋隱公五年秋衛師入邾

左傳衛之亂也成人侵衛故衛師入邾

杜注地在東平岡父縣西南有邾鄉

廬陵李氏曰邾之事書于經者四考其始末一入於衛再入於

齊鄭既而又降於齊又十一年而奔魯春秋不復書矣夫以文

昭之懿受甸伯之爵而迫脅於諸侯如此春秋抑強扶弱之書

安得不重感乎齊鄭猶可也衛邾兄弟之國而若是甚矣

臨川吳氏曰衛與邾皆文王之子所封邾乘亂侵衛已非禮衛

又報復而入其國莒入向魯入極且不可況以師而入兄弟之

國乎

十年冬十月壬午齊人鄭人入邾

左傳蔡人衛人邾人不會王命冬齊人鄭人入邾討違王命也

臨川吳氏曰邾自五年衛入邾之後邾遂服屬於衛故爲衛之與國

八年夏師及齊師圍邾邾降於齊師

胡傳書及齊師者親仇讐也圍邾者伐同姓也邾降於齊師者見伐國無義而不能服也

張氏曰書及內之志也魯與邾皆文王之昭蓋同姓兄弟之當親者莊公忘親而志於取邾姑俟陳蔡而陳蔡不來然後要齊以圍之所以邾不服魯而降於齊春秋直書以見其從讐而貪利略公而書師以著其罪

公羊傳成者何盛也盛則曷爲謂之成諱滅同姓也曷爲不言降吾師辟之也

臨川吳氏曰說者謂魯欲取邾而結陳蔡同伐陳蔡不至乃籍力於齊接魯弱於齊齊豈肯爲魯後魯亦何敢後之哉蓋齊欲圍邾而徵兵於魯與陳蔡爾邾畏齊而不畏魯故齊魯同圍而邾獨降齊也

劉氏曰公羊之說非也實共圍成改謂之盛實滅其國改謂之降實降於魯又獨言齊皆非聖人之文也聖人諱國惡如改白爲黑亦不可傳世矣穀梁云不使齊師加威於邾故使若齊無功而邾自降審如此春秋爲縱失齊師之惡也

文公十二年春王三月邾伯來奔

左傳邾太子朱儒自安於夫鍾國人弗徇邾伯卒邾人立君太子以夫鍾與成邾來奔公以諸侯逆之非禮也故書曰邾伯來



奔不書地尊諸侯也

公羊傳盛者何失地之君也何以不名兄弟辭也

趙氏曰諸侯嗣位未踰年稱子豈有君父病而不視死而不視身未卽位以邑出奔猶但稱名況未嗣位乎左氏之說非也失地之君例書名若以兄弟之國不名曹伯陽衛侯衎何以書乎公羊之說非也

劉氏曰意者先邾伯以去年卒太子卽位而不能自安遂出奔以其卽位自淺或謂之太子而左氏誤以爲太子出奔也且魯但以諸侯逆之便謂之邾伯春秋又沒其專土叛君之罪及諸之諸侯則何以言不登叛人哉

汪氏曰左傳謂邾太子朱儒稱邾伯晉太子州蒲稱晉侯

許叔入許不稱許男衛武盟踐土止稱衛子安有竊地之臣子而予之以爵君在而世子擅其位亦予之以其君之尊稱者哉若以太子而書爵則子般子野之卒皆當書公薨而蔡世子南當書蔡侯矣春秋辯名分之書若曰因其悖國從而志之則吳楚可以書王而不革也

孫氏曰諸侯失地皆名此不名者非自失國也莊八年邾降於齊師自是入齊爲附庸此又來魯爲齊所偏耳故不名也

左傳成公十三年五月諸侯朝王遂從劉康公成肅公會晉侯伐秦成子受賑于社不敬劉子曰成子其不反乎五月諸侯之師及秦師戰於麻隧秦師敗績成肅公卒于瑕又昭公七年景王使成簡公如衛追命襄公

路史曰成卽邾也成降於齊還奔魯而滅於楚今濮之雷澤北三十里有故邾是漢屬濟北晉屬東平後遷其陽曰成陽景相璠云東卽廩立南故邾都故寰宇記以雷澤古邾伯姬姓國縣北有邾都故城誤也按漢上有邾都屬上陽非此之邾與成陽樂史安爾春秋成公十三年成子會晉侯伐秦成肅公邑乃周地昭公十年公圍邾乃魯地又隰邾蘇忿生邑在河內皆與此成異卮言曰成降於齊邾伯奔魯成已滅矣而傳於成公之十三年復有成肅公成簡公路史以爲又一成也然生稱子卒謚公則亦畿內諸侯若劉康公之類也而世系無傳豈成伯之後仕于周者復予以采地之封乎按志今山東汶上縣有邾國城

霍

史記曰霍叔處其後爲晉所滅

索隱曰永安縣西南汾水西有霍城古霍國有霍水出霍大山

竹書穆王十六年霍侯舊臯

穆傳天子東遊宿于防霍侯舊告臯

史記晉獻公十六年晉趙夙爲將伐霍霍公求奔齊晉大旱卜之曰霍太山爲崇使趙夙召霍君於齊復之以奉霍太山之祀晉復禳

路史曰霍處以祿父降而經死其後穆王時有霍侯晉獻公滅霍霍公奔齊以大旱召而復之旋滅于晉今晉之霍邑有霍太山霍水郭璞云平陽永安西南汾水之西有霍城非六安之霍卮言曰按志今山西霍州

冉

史記曰冉季載其後無所見

左傳文公十四年周公將與王孫蘇訟於晉王叛王孫蘇而使尹氏與聃啓訟周公于晉

路史曰武王之封母弟也惟季載少使食於沈成王立爲司空爰封之冉曰冉季是爲駟陶也本作肉京兆今有陶亭世繆爲聃春秋尹氏訟聃啓鬪草囚鄭聃伯亦皆作聃太史公聃作冉或以爲借不知其誤今亦或作乃聃龐國於雲安冉本巴東蠻不可不辯然記皆謂季載封沈按周公八年晉獲沈子揖豈季載哉疑沈又聃之訛不然或聲之轉也

毛

史記曰武王克商尚父牽牲毛叔鄭奉明水

書顧命曰王憑玉几乃同召太保奭芮伯彤伯畢公衛侯毛公

集傳同召六卿司空第六毛公領之毛公與召公舉公爲三公

穆傳曰天子西征南還命毛班逢固先至於周以待天之命天子

見許男於滄上毛公舉幣王

竹書康王十二年秋毛懿公薨穆王十二年毛公班共公利達公

固帥師從王伐犬戎二十五年荆人入徐毛伯遷帥師敗荆人於

沛共王九年春正月丁亥王使內史良錫毛伯遷命

左傳僖公二十四年王叔帶以狄師伐周周師大敗獲周公忌父

原伯毛伯

春秋文公元年夏四月天王使毛伯來錫公命

杜氏曰毛國伯爵諸侯爲王卿士者

九年春毛伯來求金

左傳毛伯衛來求金非禮也不書王命未葬也

公羊傳毛伯者天子之大夫也何以不稱使當喪未君也

宣公十五年玉札子殺召伯毛伯

左傳王孫蘇與召氏毛氏爭政王子捷殺召戴公及毛伯衛

昭公二十六年冬十月尹氏召伯毛伯以王子朝奔楚

左傳昭公十八年二月己卯周毛得殺毛伯過而代之萇弘曰

毛得必亾是昆吾稔之日也侈故之以而毛得以濟侈於王都

不亾何待二十四年王子猛卒尹氏立王子朝敬王居於狄泉

二十六年王入成周王子朝及召伯之族毛伯得奔楚

路史曰毛庶氏也武王克商以毛叔鄭從成王以鄭為三公劉原

父得毛伯敦疑為鄭穆王時有毛伯班鄭以為毛伯衛之先也

河南籍水傍有毛泉近上邽

卮言曰毛自毛懿公之後穆王時有毛伯班毛伯遷襄王時有毛

伯定王時有毛伯衛景王時有毛伯過敬王時有毛伯得助子朝

為亂而毛氏亾矣

郟

春秋隱公元年夏六月壬戌公敗宋師於菅辛未取郟

桓公二年取郟大鼎於宋納於太廟

僖公二十年夏郟子來朝

公羊傳郟子者何失地之君也何以不名兄弟辭也

劉氏曰若失地之君何得言朝又公羊以郟滅在春秋前按春

秋以來且九十年郟子失地殆二世矣猶能自歸同姓躬行朝禮無乃不近人情乎

廬陵李氏曰何氏特据郟大鼎之文以為春秋時宋已滅郟此無據之言也不可取然郟惟此一處見他無所考

夾澗鄭氏曰郟有二桓二年取郟大鼎北部也在今單州成武郟子來朝南部也今單州有三郟城

王氏曰郟分南北皆附庸於宋

路史曰郟郟也告分南北南後入晉北入宋今登封有南部城是為南部曹之考城東南有北部城是為北部又與晉郟異太原今有郟城所謂箕郟也

扈言曰春秋隱公敗宋師於管取郟則郟之屬宋舊矣夫郟有大鼎固知其初為大國也是為北部若南部雖屬宋而國未亾也故僖二十年朝魯今山東城武縣有郟國城

雒

路史曰今懷之修武有故雒城范志云山陽有雒城周罍有雒公緘鼎非秦之雒

畢

史記畢公高與周同姓武王伐紂畢公把小鉞以夾武王武王克商而高封於畢是為畢姓其後絕封為庶人或在中國或在夷狄

史記畢公見魏世家

索隱曰左傳富辰說文王之子十六國有畢原豐郇言畢公是文王之子此云與周同姓似不用左氏之說馬融亦云畢毛文

王庶子杜預云畢在長安縣西北

王義曰括地志云畢原在雍州萬年縣西南二十八里

卮言曰史記周紀云武王伐紂弟周公把大鉞畢公把小鉞以夾武王明爲文王之子而魏世家又云與周同姓蓋疑而未決也然考之於書周初惟周公召公畢公毛公得爲三公亦必親賢如周公而後可也且畢邾者王季所都文王所葬必不以封疎屬而畢毛豐荀所封皆在豐鎬舊基與周公無異其爲父子無疑矣畢之世經傳無考其後有畢萬事晉封於魏卒以分晉則畢公之流澤遠也

書顧命曰王不懌乃同召太保奭芮伯彤伯畢公衛侯毛公

集傳王召六卿司馬第四畢公領之與召毛爲三公故稱公

書畢命曰惟十有二年三月王朝步自周至於周至於豐以成周之衆命畢公保釐東郊王若曰嗚呼父師

集註畢公嘗相文王故康王就豐文王廟命之代周公爲太師故曰父師

書康王之誥曰王出在應門之內太保率西方諸侯入應門左畢公率東方諸侯入應門右

鄭氏曰周中分天下諸侯主以二伯自陝以東周公主之自陝以西召公主之召公率西方諸侯蓋西伯舊職畢公率東方諸侯則繼周公爲東伯矣

穆傳曰天子東遊宿於防畢人告戎曰陵翟來侵天子使孟兪如

畢討戎

竹書穆王十四年秋翟人侵畢

潘

路史曰畢公高之子季孫邑於潘魏王地記云下洛城西南四十  
潘城是

龐

路史曰畢公之後復分龐鄉越世家所謂讐龐長沙者

馮

東觀記曰魏之別封曰華侯華侯孫長卿食菜馮城

路史曰畢公後采馮亭春秋有馮簡子杜云歸姓然無攷後漢封  
鮐亦云魏之支別菜馮城說文亦云鄆姬姓國今范陽李澤中有  
馮水即古馮池故馮夷國

原

國語曰文王詢于八虞而諮于三虢謀於原蔡而訪於辛  
以周召畢榮

卮言曰國語文王謀於原蔡是文王時已有原矣原蔡皆文王  
之子當文王世未有封采也亦如周召畢毛之屬追稱之耳  
史記周紀曰武王伐紂原公把小鉞

左傳桓公十七年虢公晉侯鄭伯使原莊公逆王后于陳二十一  
年鄭伯殺王子頹

僖公二十四年大叔帶以狄師伐周大敗周師獲周公忌父原伯  
毛伯

卮言曰史記子帶之亂王紂翟后翟人來誅殺譚伯索隱曰國  
語亦云殺譚伯而唐固據左傳文讀譚為原春秋有譚何妨此

時亦仕王朝預獲被殺國語既云殺譚伯故太史公依之不從  
左傳說也按此時齊已滅譚矣當從傳作原伯

又僖公二十五年冬晉侯圍原命三日之糧原不降命去之謀出  
曰原將降矣軍吏曰請待之公曰得原失信所亾滋多退一舍而  
原降遷原伯賁于冀趙衰爲原大夫

周語晉侯使隨會聘於周定王饗之殺烝原公相禮范子私於原  
公曰吾聞王室之禮無毀折今此何禮也王見其語也召原公而  
問之原公以告

昭公十二年周原伯絞虐其輿臣使曹逃冬十月壬申朔原輿人  
逐絞而立公子跪尋絞奔郊昭公十八年秋葬曹平公往者見周  
同伯魯焉與之語不說學歸以語閔子馬閔子馬曰夫學殖也不  
學將落原氏其亾乎二十九年三月己卯京師殺召伯盈尹氏同  
及原伯魯之子

水經曰濟有二源東源出原城卽晉伐者今孟州濟源西北九里  
有古原城

路史曰今澤之沁水縣西北有故原城晉伐原者後趙同爲原大  
夫卽此或云忿生邑或云濟源

卮言曰原自原公之後桓王時有原莊公襄王時有原伯爲翟人  
所獲矣又有原伯賁晉文遷之冀蓋獲之而未殺遷之而未滅也  
故其後復仕周定王時有原公景王時有原伯絞敬王時有原伯  
魯至是而原始亾按志今河南濟源縣古原國也



竹書成王十九年王巡狩侯甸方岳召康公從歸于宗周遂正百官黜豐侯

史記秦襄公元年以女弟繆嬴為豐王妻

路史曰初文王作豐邑以治南國武王克殷封豐侯于豐坐酒亾國今永興鄠北二十里豐水之西有豐故城竇苹云在長安縣之靈臺鄉

荀

竹書昭王六年王賜郇伯命

詩曹風曰芄芄黍苗陰雨膏之四國有王郇伯勞之

服虔曰郇國在解縣東郇瑕氏之墟也

水經注曰涑水西徑郇城郇伯故國也今解故城東北二十四

里有故城在猗氏故城西北俗名為郇城

路史曰荀珣郇也今猗氏西南古郇城是杜佑云猗氏古珣國

竹書紀年次于郇者或云邠之三水邠邑非也晉伐荀以賜原

氏則河東矣汾水所經荀城也應劭以邠為伐晉之郇侯誤

左傳桓公九年秋虢仲芮伯梁伯荀侯賈伯伐曲沃

竹書桓王五年

曲沃武公元年

荀人董伯皆叛曲沃十三年

武公九年

晉曲沃

滅荀以其地賜大夫原氏黯是為荀叔

卮言曰左傳僖二十四年有郇瑕氏杜云荀瑕古國伏氏云在解

東郇瑕氏之墟地薄水淺近於鹽謂鹽澤也然郇與瑕二按志今

山西猗氏縣古郇伯國

右文昭之封

于

富辰曰邾晉鴈韓武之穆也

路史曰武之穆四唐為長後曰晉次桓叔韓是也邾三鴈四而狄寒亦其別者富辰曰邾晉鴈韓吾知其說無推次也今懷治河內故邾縣京相璠云河內野王西北三十里有古邾城邾亭邾臺水經云故邾國一云邾氏邑在陽曲東七十里即為邾者周以與鄭後屬晉

卮言曰按志今河南懷慶縣有邾臺榭

應

路史曰古應侯敦作鴈今作應盟會圖云汝之魯山有故應城今在葉

韓詩外傳曰成王戲弟以桐葉圭封之周公曰天子無戲言請封之王應聲而封之曰應侯

卮言曰呂氏春秋及史記諸書皆以剪桐葉之封為叔虞前說誤

韓

路史曰武之穆四唐為長後曰晉次桓叔韓是也

竹書成王十二年王師燕師城韓王錫韓侯命

詩大雅韓奕首章曰奕奕梁山惟禹甸之有倬其道韓侯受命王親命之續戎祖考無廢朕命

孔氏曰左傳云邾晉應韓武之穆也是韓侯之先武王之子也其封當在成王時命為侯也

集註奕奕大也梁山韓之鎮也在今同州韓城縣韓國名侯爵

武王之後也受命蓋卽位除喪以士服入見天子而聽命也續  
繼戎汝也言王錫命之使繼世而爲諸侯也韓侯初立來朝始  
受王命而歸詩人作此以送之

二章曰四牡奕奕孔修且張韓侯入覲以其介圭入覲于王王錫  
韓侯淑旂綬章

集註介圭封圭執之爲贄以合瑞于王也

三章曰韓侯出祖出宿於屠顯父餞之清酒百壺

疊山謝氏曰申伯之行王親餞之韓侯之行王使顯父餞之禮  
亦有等差也

六章曰溥彼韓城燕師所完以先祖受命因時百蠻王錫韓侯其  
追其貊奄受百國因以其伯實墉實壑實畝實籍

集註燕召公之國也追貊夷狄之國也韓初封時召公爲司空  
王命以其衆爲築此城如召伯營謝山甫城齊之類王以韓侯  
之先因是百蠻而長之故錫之追貊使爲之伯以修其池治其  
田畝正其賦稅而貢其所有於王也

豐城朱氏曰昔先祖受命旣因百蠻而爲之長今韓侯受命復  
因追貊以爲之長卽上文續戎祖考也

竹書宣王四年王命蹶父如韓韓侯來朝平王十四年晉人滅韓  
路史曰漢有博士寒郎乃武王子寒侯後也春秋定公十年傳云  
寒氏蓋晉地一曰五氏南宮中鼎云王在寒師卽此字書鄭

羅氏曰嗚呼聖人之經畫大略爲世長慮豈後世腐儒之所知耶  
昔者周公弔二叔之不成於是封文之昭武之穆者二十有餘國

二叔不咸周公宜戒同姓強大之禍而弱宗國矣乃復大封同姓  
焉此可與腐儒言與先漢孝武懲七國強大之禍於是務削宗支  
逮元成時宗國滅矣而移漢者王家也孰爲來哉

卮言曰傳記皆以韓爲武穆之封而路史以韓爲寒亦有考據然  
詩云韓侯受命昔先祖受命則韓之爲國舊矣且以燕師完韓城  
而韓侯長百蠻則是外大國非內諸侯比也周自成康後鄭之外  
無大封建也韓侯爲武王之子所封明甚北方地寒詩云奄受北  
國疑寒韓字通先後稱異耳

桓

路史曰武王之子桓叔封韓其初封桓竹書紀年有桓侯非謚也  
漢亦有桓邑侯

翟

唐表曰成王封母弟孝伯於狄城爲狄氏

路史曰續志臨濟本狄國唐韻云春秋時爲狄國也

卮言曰據路史成王旣封母弟於狄爲狄氏矣又侯次子于翟爲  
翟氏按翟卽狄也狄名甚不雅馴而成王以封子弟必有一誤耶  
存之以俟學者

右武穆之封

凡

國語富辰曰凡蔣邢茅胙祭周公之胤也

路史曰周公之胙七長魯禽父次凡伯次伯齡封蔣男次靖淵封  
邢侯次祭次胙次茅

王時凡伯作板詩以刺之幽王時凡伯作瞻卬召旻詩以刺之  
孔氏曰凡伯周公之後入爲王朝卿士春秋書天王使凡伯來  
聘則此伯亦其苗裔世爲王臣也

曹氏曰凡伯作板詩在厲王末至幽王大壞之時七十餘年矣  
决非一人猶家父也

春秋隱公七年冬天王使凡伯來聘戎伐凡伯於楚丘以歸

左傳初戎朝於朝發幣於公卿凡伯弗賓冬天王使凡伯來聘  
還戎伐之于楚丘以歸

胡傳國而曰伐此一人而曰伐見其以徒衆也楚丘衛地以歸  
易辭也于楚丘者罪衛不救王臣之患以歸者罪凡伯失節不  
能死於衛也

杜氏曰凡伯周卿士凡國伯爵汲郡共縣東南有凡城

路史曰杜預云共縣東南有凡城袁山松云西南郡國志共有凡  
亭詩凡伯國隱公十年戎伐凡伯者今衛之共城西南二十二里  
凡故城也又臨胸東陽城亦曰凡而益都有凡山

蔣

路史伯齡封蔣男後以功侯班志云汝南期思治蔣鄉古蔣國楚  
滅爲期思今尉城西五十里故蔣城是

邢

穆天子傳曰天子西征殞盛姬于轂丘之廟邢侯曹侯來弔

詳曹世章

左傳隱公五年曲沃莊伯以鄭人邢人伐翼

杜注邢國在廣平襄國縣

春秋莊公三十二年冬狄伐邢閔公元年春正月齊人救邢

高氏曰夷狄犯中國而謂之伐中國不自正故也

又僖公元年春正月齊師宋師曹師次於聶北救邢

臨川吳氏曰莊三十二年狄伐邢閔元年齊救邢蓋齊師進而狄退故不言戰狄師雖不逼邢然兩年之間以兵蹂踐邢衛之境二年冬破衛則狄勢愈張既入衛又移師於邢故桓率諸侯次聶不救邢邢不能支狄衆潰而出奔就諸侯之師諸侯遂以師逐狄人而退之

趙氏曰公羊傳云邢已亾矣蓋狄滅之按邢實未亾何得云亾又云不言狄滅之爲桓公諱也若實諱前年狄入衛何得書乎又云君其稱師何不與諸侯專封也按齊宋曹三國君實不在但使師救爾何甲曲爲異說邢實未亾又何封乎

夏六月邢遷于夷儀齊師宋師曹師城邢

左傳諸侯救邢邢人潰出奔師師遂逐狄人具邢器同而遷之師無私焉夏邢遷於夷儀諸侯城之救患也

啖氏曰如宋人遷宿齊人遷陽是移其國中爲附庸公羊云遷者非其意是也如邢遷於夷儀衛遷於帝丘或自請遷或自遷仍爲列國故不言某人遷之但言其移國都而已公羊云遷者其意也是也

僖公十六年冬十二月公會齊侯宋公陳侯衛侯鄭伯許男邢侯曹伯於淮

高氏曰邢侯始與會而在鄭許之下者此齊次之也

十八年冬邢人狄人伐衛

左傳十七年齊桓公卒宋襄公以曹伯衛人邾人伐齊十八年冬邾人狄人伐衛圍菟園衛侯師於訾婁狄師還

高郵孫氏曰衛嘗見滅於狄而齊桓封之桓死未踰年而衛與諸侯伐之邾自以復存者桓公也於是不忍齊之見伐而衛之無息也與狄人伐之

臨川吳氏曰邾爲周公之胤衛爲武之穆皆嘗亾於狄賴齊而復存今衛伐齊喪固有罪矣然爲宋所驅非主兵首惡也敵國不相征凡與師伐人者皆不義也况邾小國猶不當黨異類伐同姓或者逼於狄之命而不得已也然其後衛竟滅邾其怨讐未必不甚于此

高氏曰伐衛以邾爲首者衛雖有罪而邾不當與狄連兵以代兄弟之國且不可以夷狄先中國也

### 十九年秋衛人伐邾

高氏曰衛不伐狄而伐邾是以人之

### 二十年秋齊人狄人盟于邾二十一年春秋侵衛

左傳齊狄盟于邾謀衛難也於是衛方病邾

穀梁傳邾小其爲主何也其爲主乎救齊

汪氏曰伐衛盟邾春秋皆以狄稱人於齊邾之下而不殊序所以深惡中國之衰也

### 二十五年春王正月丙午衛侯燬滅邾

左傳衛人將伐邾禮至曰不得其守國不可得也我請昆弟往焉乃往得仕衛人伐邾二禮從國子巡城掖以赴外殺之正月

丙午衛侯燬滅邢同姓也

胡傳衛侯何以名滅同姓也春秋之法諸侯不生名滅同姓則名者謂其絕先祖之裔滅骨肉之恩故生而書名示王法不容誅也然則晉滅虞楚滅夔亦同姓也曷爲不名曰例之變也邢雖與狄伐衛爲救齊也衛人不反思而遷怒於邢又遣二禮誘其守而殺之與虞公會以易國者其情異矣若荆楚僭王比諸夷狄於滅同姓乎何誅

朱子曰諸侯滅國未嘗書名衛侯滅邢說者以爲滅同姓故書名今經文只隔夏四月癸酉一句便書衛侯燬卒恐是因而傳寫之誤亦未可知

黃氏澤曰衛侯滅邢先儒皆謂譏滅同姓澤更推尋以爲成王既封周公之子伯禽於魯又封其支子六人所以答周公之功勞及至春秋時往往爲人吞并今邢又爲衛所滅矣邢與魯同出自周公則邢之存亾於魯甚相關衛既忍於滅周公之後而魯不能爲之請於天子請於大國請於衛以復存其社稷以篤親親之恩春秋雖罪衛侯而亦繫於魯

李氏琪曰吾觀於邢而後知亾國之自取也夫邢周公之後嘗爲狄所滅矣齊伯城邢而春秋大之則邢衛之宗也而衛文滅邢春秋宜如何而惡之經書衛侯燬滅邢衛之罪著矣雖然列國之事滅人者罪易見見滅者罪難知春秋之法端本而後治末正已而後責人則書邢之見滅於衛邢獨無罪乎觀春秋書邢之本末而求邢之所以亡則罪之在衛者三在邢者五不可不察也何謂衛



之罪懷怨以謀人國罪之一伐本以滅同姓罪之二文公稱有道之君而以計殺國子挾詐以掩人之不疑罪之三此罪之在衛者也何謂邢之罪邢方無道衛有令政以邢伐衛是不度德也邢蕞爾國而衛爲大邢之盟實爲主乎伐衛是不量力矣衛以文昭之親邢則兄弟之邦不知此衛而始尋師以之怨是不親親矣伐齊之役實始於宋釋甌之憾宜不在衛而乃舍宋以治衛是不察有罪矣是雖均之爲罪然豺狼之人非我族類忘其世仇而同之以伐國卽夷謀夏所以深衛之忿而速邢之亾則罪之尤大者歟觀罪之在邢者如此則衛之滅邢豈直衛侯之罪哉詩云駉駉角弓翩其反矣兄弟婚姻無胥遠矣民胥然矣邢之伐衛其爲反也不亦甚乎衛之滅邢其爲然也不亦宜乎是聖人所以書邢之意

路史曰邢治龍岡城內西南隅小城也秦之信都莽之襄國隋爲邢州應邢邢從并說文戶經切乃作邢故字書矣以邢爲邢而邢邢爲二

卮言曰按志今北直隸順德府古邢國

夷儀

路史曰范志東郡城有夷儀聚瓚云夷儀城在襄國西北里劭云邢侯自襄國徙此曰邢丘在河之臯曰平臯有平臯城班彪後漢志云縣有邢丘故邢國周公子所封非也平臯邢丘非始國也

祭說文作祭

路史曰祭伯爵商伐國後爲周圻內周公之子事文王受商之命祭叔爲卿士其後祭公謀父事穆王

外國言  
卷十三  
國語穆王將征犬戎祭公謀父諫曰不可

韋昭曰祭畿內之國周公之後為王卿士謀父字也

逸書祭公解曰王若曰祖祭公祭公於穆王在次子小子虔虔位在祖列故稱之云

竹書昭王十九年祭公辛伯從王伐楚穆王十一年王命卿士祭

公謀父十三年祭公從王西征次于陽紆二十一年祭文公薨

春秋隱公元年冬十二月祭伯來

穀梁傳來者來朝也其弗謂朝何也寰內諸侯非有天子之命

不得出會諸侯不正其外交故弗與朝也聘弓鏃矢不出竟場

束修之肉不行竟中有至尊者不貳之也

程子曰祭伯畿內諸侯為王卿士來朝魯不言朝不與其朝也

當時諸侯不修朝覲之禮失人臣之義王所當治也祭伯為王

臣不能輔王正典刑而反與之交又來朝之故不與其朝以明

其罪先儒有王臣無外交之說甚非也若天下有道諸侯順軌

豈有內外之限其相交好乃常禮也然委官守而遠相朝無是

道也周禮所謂世相朝謂隣國耳

東萊呂氏曰凡春秋書來其義有三內女書來例也中國書來

貶也戎狄書來略也祭伯以畿內諸侯而書來意者以私交而

貶之乎祭伯為周卿士親見王綱頹廢不能佐天子而一正之

乃下比外交於列國宜聖人深貶之也昔召伯亦嘗為王卿士

矣黍苗之詩曰芄芄黍苗陰雨膏之悠悠南行召伯勞之召伯

一行而四國被其澤至與上天之膏雨分功其盛乃如此蔡伯

一出而春秋賤之使與介葛盧白狄比抑何衰耶召伯伯也祭

伯亦伯也班爵同而榮辱異作經者豈有增愛於其間哉咸其自取之耳

廬陵李氏曰春秋有祭伯又有祭公祭叔杜氏於祭公則曰諸侯爲天子三公者徐邈注穀梁又以祭叔爲祭公來聘則意以祭叔爲祭之大夫范氏旣以叔爲寰內諸侯而有以叔爲名公羊疏遂以公爲爵伯爲字而以爲一人兩無所據豈非伯者本爵公者此時入爲三公而叔者祭之大夫乎姑存于此以俟續考

正義曰僖二十四年傳富辰說周公封建親戚以蕃屏周而云邢茅胙祭則祭之初封畿外之國也穆王之時有祭公謀父今有祭伯世仕王朝蓋本封絕滅食采於王畿也莊二十三年祭

叔來聘注以爲祭叔爲祭公來聘魯天子內臣不得外交是祭於此時爲畿內之國仍有封爵故言諸侯爲王卿士也釋例曰王之公卿皆書爵祭伯凡伯是也大夫稱字南季榮叔是也元士中士稱名劉夏石尚是也下士稱人公會王人于洮是也其或稱祭公舉官而言之此其定例也然春秋之世有王之卿士無采地者若王叔陳生伯輿之屬是也但未知書經其稱云何杜旣云公卿稱爵而王子虎及劉卷卒稱名者彼是天王爲赴以名告魯如諸侯之例薨則稱名此云公卿稱爵者謂聘使往還與彼爲異也又襄十五年註云天子卿書字者以傳云劉夏逆王后于齊卿不行非禮也以劉夏非卿書名若卿則應書字以名字相對故舉以言焉其實卿書爵也此祭伯若王使來當

云夫王使祭伯來聘亦如天王使凡伯來聘今以自來爲文明  
非王命而私行也劉炫云卿而無爵或亦書字大夫有爵或亦  
書爵傳稱王叔陳生與伯輿爭政俱是卿士並不言爵又滕侯  
之先爲周卜正書稱齊侯呂伋爲虎賁氏則大夫或有爵也然  
則大夫有爵不可舍爵而書氏卿而無爵不可越字而書名蓋  
有卿士亦書字大夫亦書爵也王臣之見經者衆祭伯凡伯毛  
伯單伯召伯尹子單子劉子其間未必無大夫榮叔南季家父  
叔服其間未必無卿但無明證故依例解之襄十五年註云天  
子卿書字是言天子卿有書字之理

桓公八年冬祭公來遂逆王后于紀

胡傳劉敞曰祭公王之三公也曷爲不稱使不與王之使祭公  
也三公之任重矣今其來魯乃命魯侯以婚姻之事也若是則  
大夫可矣何必三公任之重使之輕故祭公緣此義得專命不  
報遂行如紀而王以輕使爲失祭公以遂行爲罪矣

庖言曰前書祭伯來此書祭公來蓋無異義特前未執政而今  
爲三公也豈祭公私交於魯擅命而行乎

春秋莊公三十二年庚戌春祭叔來聘

穀梁傳其不言使何也天子之內臣也不正其外交故不與使  
也

范氏曰祭叔天子寢內諸侯南季渠伯糾家父宰周公來聘皆  
稱使獨此奪之諸稱使者是奉王命今祭叔不得王命故去使  
以見之

王氏曰祭采地叔字天子之大夫也儻不以王命來則當以祭伯來之例書儻以王命來則當以天王使凡伯來聘之例書今但曰來聘見其假王命而私交也

臨川吳氏曰祭圻內之國王臣也不當外交諸侯而祭自入春秋伯之來公之來叔之來聘凡三交魯矣王臣私交之非禮或朝或聘其罪一也

呂氏曰祭伯來朝而不言朝祭叔來聘而不言使然祭伯來私來也言來則不當言聘言聘非自來也或謂祭叔使人來聘其不稱叔使不與祭叔之使亦非也此與武氏子來求賻毛伯來求金一例爾

汪氏曰或云祭叔乃祭公之臣或以爲祭公之弟果其臣若弟而不言使則是隱私交之迹矣或云祭叔請王命而來聘則何以削不稱使邪

路史曰祭城在開封長垣今營城東北十五有祭祭城

卮言曰按志今河南鄭州有祭城

訾

姓苑曰祭氏以不祥改爲訾

路史曰訾有二西訾在維詳見前東訾在鞏西有故城周單子取

胙

路史曰今滑之胙城燕并之故曰南燕後漢燕縣屬東郡本南燕國有胙城古胙國杜預云城在西南本屬酸棗有胙亭唐武德六年爲胙州

茅

路史曰茅在戚之東鄙本衛邑春秋襄公二十六年殖綽伐茅氏是也茅盈系云姬胄之分漢有東茅侯預云高平昌邑西有茅鄉城今金鄉非修武之茅

卮言曰左傳隱公十一年桓王與鄭蘇忿生之田温原攢茅其後蘇子叛周卽狄爲狄所滅叔帶之難居于温襄王出奔鄭僖公二十五年晉文公納王王與之温原攢茅之田是茅蓋近温温子與周爭其田則茅雖爲周采亦嘗屬温矣茅田旣可周可温可鄭可晉茅固不成國特其宗祀未亾耳故不曰茅而曰茅氏傳襄公二十六年衛人侵戚東鄙孫氏愬于晉晉成茅氏殖綽伐茅氏殺晉成三百人此時茅氏城邑尚存也又傳哀公七年公伐邾茅成子

請告於吳不許成子以茅叛師遂入邾以邾子益獻于亳社邾茅夷鴻以東帛乘韋自請救於吳曰魯入晉而遠吳以陵我小國邾非敢自愛也懼君威之不立云云吳子從之則茅又屬邾豈茅與茅氏爲二或先後分屬耶而曰伐茅氏又曰以茅叛則皆有土者也按山東崑陽縣有茅鄉亭

右周公之胤

海君道部卷之三十三

茅掬編

世系類

列國譜系 十四

古國篇 七

周後國章 二

陽

春秋閔公二年春王正月齊人遷陽

張氏曰陽國名漢志東海陽都縣是其國也

家氏曰齊桓遷邢義也為其有狄難輔而遷之別擇善地以為之國都霸者之所得為也遷陽事不見於傳以書法而觀亦宋人遷宿之類蓋遷小國以為附庸并兼之異名春秋所惡書以

貶之

汪氏曰齊人遷陽以力逼而遷之也不地者自是不復見也滅譚滅遂桓公初年之事也降鄆遷陽則不絕其祭祀矣存邢存衛存祀則興滅繼絕之意也

春秋昭公十二年齊高偃帥師納北燕伯于陽

左傳曰納北燕伯款于唐因其眾也

杜氏曰二年燕伯出奔齊今因唐眾欲納之故得先入唐不言

于燕未得國都也陽即唐燕別邑中山有唐縣

路史曰陽本曰唐併之大俗漢之陽邑今定之唐縣班志云燕之

別邑齊人遷之

卮言曰燕幽也陽在燕之南故曰陽是燕分也齊桓公遷陽以為

附庸未滅其國也至是一百餘年矣齊公納北燕伯于陽蓋已

入其故土如入燕矣春秋善之而左傳謂因唐眾欲納因而納之

亦全宗國之意也按志今北直隸高陽縣古陽

盛

穆天子傳曰天子盛姬姬姓盛伯之子也注公羊傳曰成者盛天也諱滅同姓故曰成

子賜之上姬之長是曰盛門

姓纂曰先姓顛後改為盛蓋以漢元諱意其字曰盛而召公之名

字皆為顛也

路史曰盛伯國亦曰成績志云濟北成本國預謂東平剛父西南

有盛鄉竇辛云鄉今在鄆即晉之剛火

譙



路史曰召公輔周西伯夫人紹兩交龍不樂遂娠生子有文在手  
曰盛因各氏之年十有八封之譙曰譙侯

竹書平王七年號人滅焦

路史又曰焦今弘農陝是也本號之上陽晉滅之其大城中小城  
故焦也梁載言云姬姓之焦與亳之姜姓焦別酈元以爲神農之  
後歐志亦謂武封炎後在此非也按左傳云虞號焦滑皆姬姓也  
而晉滅之晉是以大後十五年燭之武說秦亦以焦瑕

右燕召之分

頓

左傳僖公二十五年秦晉伐郟楚會尹子王追秦師弗及遂圍陳

納頓子于頓

頓迫於陳而出奔楚  
故楚伐陳納頓

春秋昭公二十三年秋七月吳敗頓胡沈蔡陳許之師于雞父

左傳吳伐州來楚師及諸侯之師奔命救州來吳公子光曰諸  
侯從於楚者衆而皆小國也畏楚而不獲已是以來胡沈之君  
幼而狂陳大夫壯而頑頓與許蔡疾楚政七國同役而不同心  
帥賤而不能整無大威命楚可敗也吳子從之戰于雞父獲胡  
沈之君

胡傳諸侯之師曷爲畧而不序頓胡沈則其君自將蔡陳許則  
大夫帥師

春秋定公四年春三月公會劉子晉侯宋公頓子于召陵侵楚

卮言曰頓子始與諸侯之會序莒子邾子之下滕子薛伯之上  
定公十四年春二月辛巳楚公子結陳公孫佗人帥師滅頓以頓

子牂歸

左傳頓子牂欲事晉背楚而絕陳好二月楚滅頓

家氏曰頓本楚之與國嘗與夏盟召陵之會頓子在焉去夷而即華正也陳以盛德之後當夷楚既衰猶比而從之滅國是亦夷而已矣春秋書楚陳連兵滅頓誅楚而罪陳也

啖氏曰凡書滅又書以歸及各者罪重於奔者也既責其不位又責其無匡復之志也

路史曰十三州志云南頓西二十里故頓子城在潁水之南故號潁陰城今陳之南頓故頓縣有故頓城劭云近於陳後南徒曰南頓後魏爲南頓縣

庖言曰季氏伐顓項夫子曰且在邦域之中矣何以伐爲言其小

而近不必伐也頓近於陳而陳從楚滅之陳其能與楚爭頓乎頓既屬楚而陳之勢益孤矣甚矣陳之愚也按志今河南商水縣古頓子國

穀

春秋桓公七年夏穀伯綏鄧侯吾離來朝

路史曰杜預云穀在筑陽今襄陽穀城西北五里有故穀城有穀伯廟

小穀

路史曰齊魯城小穀以爲管仲私邑縣中有夷吾并本曰穀景公曰桓公以仲爲有力邑狐與穀者乃姜會齊侯處後漢置穀城縣屬東郡晉廢入東阿故城在縣東有穀城山或曰陽穀東阿東四

十二里有陽穀亭

項

春秋僖公十七年春齊人徐人伐英氏夏滅項

左傳淮之會公有諸侯之事未歸而取項齊人以為討而止公  
公羊傳孰滅之齊滅之曷為不言齊滅之為桓公諱也春秋為  
賢者諱此滅人之國何賢爾君子之惡惡也疾始善善也樂終  
桓公嘗有存亡繼絕之功故君子為之諱也

胡傳按左氏滅項者魯也二傳以為齊滅之孰信乎考於經未  
有書外滅而不言國者如齊滅譚是也亦未有書內取而直言  
魯者如取郟取鄆取鄆是也由此知項為魯滅無疑內滅書取  
程氏以為在君則當諱是已若滅項則僖公在會季孫所為耳

家氏曰僖公德季氏假之以權待之不疑其後遂不可制襄在  
楚而宿取卞照在晉而意如納莒叛人每乘公出而肆其無忌  
由此年滅項有以啓之耳

路史曰僖公十七年左傳云魯滅項非也公穀以為齊得之此  
蒙上伐英氏文內不言滅漢之西華後四項城今縣隸陳東北  
一里有故項城楚襄王徙陳以項為別都楚考烈滅魯封其將  
於項為項氏晉諺堅不過項者史項梁父項燕世楚將封于項  
卮言曰內滅書取亦或書入未有書滅者今書滅項疑公穀之  
說得之然以為為桓公諱則非也當是蒙上伐英氏文不言遂  
者不同時也而諸儒之義亦精讀者詳之

極

春秋隱公二年夏五月無駭帥師入極

杜氏曰極附庸小國

穀梁傳曰入者內弗受也極國也不稱氏者滅同姓貶也

趙氏曰公穀皆云無駭不氏貶滅同姓之國若實滅同姓則當直書滅極以示譏且無駭卒亦不氏何關滅同姓哉

汪氏曰二傳賈伯國見春秋傳以爲滅極然滅鄆滅邾書取而極不書取則非滅也

賈

路史曰左傳芮伯梁伯賈伯伐曲沃今華之蒲城西南十八有故城賈大夫冢又臨汾有賈鄉

芮

詩大雅縣末章曰虞芮質厥成文王蹶厥至

蘓氏曰虞在陝之平陸芮在同之馮翊平陸有閑原焉則虞芮之所讓也

書顧命曰王乃召同太保奭芮伯

集傳成王將崩召同六卿司徒第二芮伯爲之

書君牙曰王若曰嗚呼君牙惟乃祖乃父世篤忠貞服勞王家厥有成績紀于太常君牙乃惟先正舊典時式民之治亂在茲率乃祖考之攸行昭乃辟之有

陳氏曰君牙稱君必有國成康時芮伯爲司徒伯爵諸侯也君牙當是其後先正謂君牙祖父也君牙由祖父舊職而是法之民之治亂在此而已

卮言曰成康時芮伯爲司徒而穆王命君牙爲司徒云率祖考攸行其爲芮伯之孫無疑不稱芮者其世顯也亦猶君陳不系

周公

詩序桑柔芮伯刺厲王也

礼氏曰芮伯周同姓國杜預云芮國在馮翊臨晉縣則在西都之畿內也左氏引大風有隧亦以爲芮良夫之詩

史記厲王三十年好利近榮夷公大夫芮良夫諫王不聽

國語厲王說榮夷公芮良夫曰榮公若用周必敗既榮公爲卿士諸侯不享王流于彘

竹書厲王八年初監謗芮伯良夫戒百官於朝

左傳桓公三年

周桓王

芮伯萬之母芮姜惡芮伯之多寵人也故逐

之出居于魏四年秋秦師侵芮敗焉小之也冬王師秦師圍魏執

芮伯以歸十年秋秦人納芮伯萬于芮

史記秦德公元年梁伯芮伯來朝成公元年梁伯芮伯來朝

路史曰芮商代國也周文王爲芮伯虞芮訟田而質成焉其後芮伯爲周司徒書注周同姓圻內國爲大夫寰宇記周司徒封芮爲

附庸非也竹書紀年晉武公七年芮伯萬之母芮姜逐萬萬奔魏

八年周師虢師圍魏取芮伯而東之九年戎入逆之邾又云桓王

十二年秋秦侵芮冬王師秦師秦穆公二年秦

滅梁芮杜預云馮翊臨晉芮鄉臨晉城在朝邑西南二里唐武德

二年爲芮州今陝之芮城西二十里有芮故城芮君祠平陸西六

十里閑原者虞芮所爭田也

魏

左傳晉女叔侯曰虞虢焦滑霍楊韓魏皆姬姓也而晉滅之晉是以大詩魏風曰彼汾沮洳言采其莫彼其之子美無度美無度殊異乎公路又末章曰彼汾一曲言采其蕢彼其之子美如玉美如玉殊異乎公族

鄭氏詩譜曰魏者虞舜夏禹所都之地在禹貢冀州雷首之北析城之西周以封同姓焉魏君儉嗇褊急不務廣修德於民其與秦晉鄰國者見侵削國人憂之當周平桓之世魏之變風始作

地理志曰魏國亦姬姓也在晉之河南曲故詩曰彼汾一曲又曰寘諸河之側

集註魏本舜禹故都南枕河曲北涉汾水其地陜隘而民貧俗儉盖有聖賢之遺風焉周初以封同姓後爲晉獻公所滅而取其地今河中府解州卽其地也蘓氏曰魏地入晉久矣其詩盖皆爲晉而作故列於唐風之前猶卽鄘之於衛也今按篇中公行公路公族皆晉官疑實晉詩又恐魏亦嘗有此官盖不可考矣此詩亦刺儉不中禮言若此人者美則美矣然其儉嗇褊急之態殊不似貴人也

水經注曰故魏國城南西二面並去大河可二十餘里北去十餘里處河山之間土地迫隘故魏風著十畝之詩

竹書桓王十一年芮伯萬出奔魏十二年王師秦師圍魏取芮伯萬而東之

左傳閔公二年晉獻公滅魏以賜其萬

路史曰景王使詹桓伯責辭於晉曰我自夏王之代以后稷之功故受魏駘芮岐畢為吾西土則周之先嘗受魏矣左傳隱公四年芮伯萬之母芮姜惡芮伯而逐之出居于魏故世或以魏為芮萬邑非也晉獻公滅魏以賜畢萬耳今陝治平陸有古魏城在河北縣在河之東北南西拒河各二十餘里  
卮言曰安成劉氏云先儒以魏所封為文公子畢公高之後按畢公之封自有畢魏則其孫萬所封也詳前卷各章

滑

春秋莊公十六年冬十二月會齊侯宋公陳侯衛侯鄭伯許男滑伯滕子同盟于幽

杜氏曰言同盟服異也滑國都費河南緱氏縣幽宋地

薛氏曰許男何以先乎滑大也非周班之序也

史記註賈逵曰滑姬姓之國正義曰預云滑都在緱氏緱氏故城本費城也在洛州緱氏縣南東二十五里

僖公二十年夏鄭人入滑

左傳滑人叛鄭而服於衛夏鄭公子士洩堵冠帥師入滑

高氏曰鄭伯與滑伯同等諸侯滑服於衛遂與師而入其國必欲滑為已屬蓋強之凌弱如此

王氏曰滑常與鄭同盟幽今中國無伯鄭首從楚遣二卿長驅而入滑無忌憚甚矣故畧而人之

左傳僖公二十四年鄭之入滑也滑人聽命師還又卽衛鄭公子士洩堵俞彌帥師伐滑王使伯服游孫伯如鄭請滑鄭伯怨王之

與衛滑也故不聽王命而執二子王怒以狄伐鄭取櫟

服虔曰滑小國近鄭世世服從而更違叛鄭師伐之聽命後自  
愬於王王以與衛

春秋僖公三十三年春二月秦人入滑

左傳秦師襲鄭及滑鄭商人弦高以東韋先生十二犒師孟明  
曰鄭有備矣不可襲也滅滑而還

茅堂胡氏曰秦人滅滑而書入者不能有其地非未滅之也而  
肆其悖心無故滅人之罪著矣

路史曰今拱之襄邑西北有滑亭為周秦晉鄭更邑本水名後遷  
于費曰費滑今偃師候氏鎮有古滑城滑臺滑伯廟非滑州去滑  
州蓋四百里

馬氏曰如晉司馬女叔侯之說則滑為晉所滅然僖公時傳云秦  
滅滑又呂相絕秦書有殄滅我費滑散離以兄弟之語則方是以  
聲秦滅姬姓諸侯之罪豈晉所滅者又別一滑耶當攷  
卮言曰按志今河南睢州西北有滑亭

徐

卮言曰路史云穆王時滅徐偃以封姬姓然考之史傳偃固未嘗  
滅也或姬姓自有徐耳

養

路史曰今汝之 城有養水楚子逆吳公使居養在此

巴

路史曰楚靈王妃巴姬之國晉文公西伐巴蜀卽此也今果之南



充杜預云巴之江州縣江州今恭之巴縣

麗

路史曰麗姬家商時國一作驪男國也秦曰驪邑盟會圖云在雒之新豐漢之新豐唐之昭應宋初改曰臨潼今臨潼東二十四里有故麗城非麗戎之國

載

路史曰左傳有載國風俗通云姬姓後陳留外黃是韻作載

國

冀

路史曰秦武公十年伐冀戎為縣今秦之清水故伏羗城秦漢之冀縣也隗貴據此稱西伯

鄭

路史曰春秋僖公二年傳云晉荀息假道于虞曰冀為不道伐鄭三門冀之既病則亦惟君故今號為不道請假道以伐之云云鄭乃虞地今陝之平陸東北二十有鄭城周四里又有上鄭成公二年公會晉師于鄭說文云晉邑也

宮

路史曰宮之奇之先國玉篇部國為徙冬切非

鱗

紀路史曰今緱丹氏故紀也

隗

右周之餘族可見者

廬陵羅氏曰烏乎姬周之國楸矣方其盛時述職朝覲會于明堂日省月攷時享歲貢來有湛露之燕去有形弓之送怡怡德偲以

藩屏周及其衰也召穆公思周德之不類故糾合宗族于成周而  
作文王之詩曰長移之華萼柎煒煒凡今之人莫如兄弟周之有  
懿德也猶曰莫如兄弟故封建之其懷柔天下也猶懼有外侮故  
以親屏周是以楚子疆梁心張問鼎而猶畏道宗周不敢竊發不  
幸後世上失其道宗國恣橫諸侯相併王官不討陵夷至于三四  
然後枝葉相扶根降爲庶尚四十年而後秦得而挹之宣王以降  
世乏令王然如齊晉勤王世有能者故猶五百歷年數極德盡而  
後位去則盤石之宗可賴也

又曰一自東遷宗國恣橫謾相侵伐以至于滅禽父一國當春秋  
伐侵國者十入國者六圍者十三取者十四而伐人之國者四十  
九會伐十九及伐者二而公之伐者又十伐若以其師伐者咸一  
大夫伐九而會伐者又六公之伐十而邾居其七公會伐十有五  
而鄭居十二人之侵我五伐我者二十一而齊居十五追戰敗滅  
不與存焉其餘爲可知矣鄉使宗國循良不躡外姓以穆諸姬則  
周室至今存可也詩云駢駢肉弓扁其反矣兄弟婚姻無胥遠矣  
爾之遠矣民胥然矣魯棄同姓從而伐之其爲反也不已甚乎齊  
之見伐其爲然也不已詢乎

廬陵李氏曰周家封國八百同姓五十逮乎春秋之世才二百四  
十二年爾而周之子孫抑何其甚微耶小國弱兵介乎大國之間  
僅若黑子之著面而地大民衆以臨蕞爾之國奚啻瘠牛之僨豚  
故郤畏魯衆齊迫燕弱漢陽諸姬楚實盡之虞虢焦滑霍楊韓魏  
皆姬姓也晉皆燕之然則周之子孫烏得不日失其序乎嗚呼齊

楚之人狡焉思啟封疆至於芟夷并吞固無足怪而同姓大國恃其強大亦徃徃自尋斧於本支何耶吾觀先王之時大比小強并弱同姓無甚強大之國也宜若不足恃而脉絡聯附垂五百年而未亾春秋以後小并於大弱并於強同姓無甚弱小之國矣同姓宜可以久立而卒之肱脾分披不能一二百年而天下無復周之子孫終至於此則知先王大封同姓之意小大相維之制所以為保民長世之道豈可誣哉豈可廢哉

卷之三十三終

學海君道部卷之三十四

茅綯編

世系類

列國譜系五

古國篇八

古帝王後國章

饒

路史曰潛夫姓氏篇曰嵬姓饒攘利鬼魏氏之後也三國宜皆炎黃之代封之今深州有饒河齊大夫采邑趙孝成拔之以封弟長安君戰國策史記趙孝成俱作惠文

攘

路史曰攘嵬姓疑即穰穰侯國秦封魏冉今鄧之穰縣

利一作糾

雲陽

路史曰今茶陵西南十里有雲陽山少昊亦居之又在甘泉亦曰雲陽山在馮翊雲陽縣今隸耀非丹徒

婁

路史曰婁石樓也開山圖云石樓山在琅邪昔有巢氏治此在城陽縣東北有婁鄉是然去琅琊遠矣今隰有隋石樓縣隋本曰上京東南六十里有石樓山水經註蒲水出石樓下是也

庸成

路史曰庸成氏國今岳之華容許所遷者是

柏

路史曰柏皇氏之後黃帝臣有柏高春秋之柏子國楚滅之今之西平有柏亭

大庭

路史曰昭五年傳有大庭氏之庫輿地廣記云在仙源今隸充

東里

路史曰栗睦氏之臣有東里子諸侯也夏后臣有東里槐

祝丘

路史曰祝宗祝丘皆祝融氏後今沂之臨沂東南五十里有卽丘城春秋之祝丘也桓公五年城祝丘鄭樵云漢卽丘縣古帝王後代名國章

巴

華陽國志曰洛書曰人皇始出繼地皇之後兄弟九人分理九州  
為九囿人皇居中州制八輔華陽之壤梁岷之域是其一囿囿中  
之國則巴蜀矣其分野與鬼東并其君上世未聞五帝以來黃帝  
高陽之支庶世為侯伯及禹治水命州巴蜀以屬梁州禹會諸侯  
於會稽執玉帛者萬國巴蜀往焉周武王伐紂實得巴蜀之師著  
乎尚書巴師永銳歌舞以凌殷人倒戈故世稱之曰武王伐紂前  
歌後舞也武王既克殷以其宗姬於巴爵之以子古者遠國雖大  
爵不過子故吳楚及巴皆曰子其地東至魚復西至棘道北接漢  
中南極黔巫其屬有濮賓直共奴穰夷蠻之蠻周之仲世雖奉土  
職與秦楚鄧為比

竹書夏帝啓八年帝使孟涂如巴涖訟

左傳 公九年巴子使韓服告于楚請與鄧為好楚子使道朔楚大

夫將巴客以聘于鄧鄧南鄙鄧人攻而奪之幣殺道朔及巴行人

楚子使遼童讓於鄧鄧人弗受言非鄧人所攻夏楚使鬬廉及巴師圍

鄧鄧養甥帥師救鄧三逐巴師不克鬬廉橫陳其師於巴師之中

以戰而北偽北走也鄧人逐之背巴師而夾攻之鄧師大敗鄧人宵潰

又莊公十八年楚文王即位與巴人伐申而驚其師巴人畔楚而

伐那處取之遂門于楚閭敖楚大游涌而逸楚子殺之其族為亂

巴人因之以伐楚楚子禦之大敗于津

又哀公十八年巴人伐楚圍鄆初右司馬子國之卜也觀瞻曰如

志及巴師至將卜師王曰寧如志何卜焉使帥師而行請承王曰

寢尹工尹勤先君者也三月楚公孫寧吳由于遠固敗巴師于鄆

故封子國於析君子曰惠王知志

華陽國志曰春秋後楚主夏盟秦擅西土巴國分遠故於盟會希與戰國時嘗與楚婚及七國稱王巴亦稱王周之季世巴國有亂將軍蔓子請師於楚許以三城楚王救巴巴國既寧楚使請城蔓子曰籍楚之靈克弭禍難誠許楚王城將吾頭往謝之城不一得也乃自刎以頭授楚使王歎曰使吾得臣如巴蔓子用城何爲乃以上卿禮葬其頭巴國葬其身亦以上卿禮周顯王時楚國衰弱秦惠文王與巴蜀爲好蜀王弟苴私親於巴巴蜀世戰爭周慎王五年蜀王伐苴侯苴侯奔巴巴爲求救於秦秦惠文王遣張儀司馬錯救苴巴遂伐蜀滅之儀貪巴苴之富因取巴執王以歸置巴蜀及漢中郡分其地爲二縣儀城江州司馬錯自巴涪水取楚商於之地爲黔中郡

蜀

華陽國志曰蜀之爲國肇於人皇與巴同囿至黃帝爲其子昌意娶蜀山氏之女生子高辛是爲帝嚳封其支庶於蜀世爲侯伯歷夏商周武王伐紂蜀與焉其地東接于巴南接于越北與秦分西奄峨嶓地稱天府原曰華陽故其精靈則井絡垂耀江漢遵流有周之世限以秦巴雖奉王職不得與春秋盟會君長莫同書軌周失綱紀蜀先稱王有蜀侯蠶叢其目縱始稱王死作石棺石槨國人從之故俗以石棺槨爲縱目人家次王曰栢灌次王曰魚鳧魚鳧王田於湔山忽得仙道蜀人思之爲立祠後有王曰杜宇教民務農一號杜主時朱提有梁氏女利遊江源宇悅之納以爲妃移

治郫邑或治瞿上七國稱王杜宇稱帝號曰望帝更名蒲卑自以功德高諸王乃以褒斜爲前門熊耳靈關爲後戶玉壘峨眉爲城郭江潛綿洛爲池澤以汶山爲畜牧南中爲園苑會有水災其相開明決玉壘山以除水害帝遂委以政事法堯舜禪授之義遂禪位于開明帝升西山隱焉時適二月子鵠鳥鳴故蜀人悲子鵠鳥鳴也巴亦化其教而力農務迄今巴蜀民農時先祀杜主君開明位號曰叢帝叢帝生盧帝盧帝攻秦至雍生保子帝帝攻青衣雄張獠棘九世有開明帝始立宗廟以酒曰醴樂曰荆人尚赤帝稱王時蜀有五丁力士能移山舉萬鈞每王薨輒立大石長三丈重千鈞爲墓志今石笋是也號曰笋里未有諡列但以五色爲主故其廟稱青赤黑黃白帝也開明王自夢廓移乃徙治成都周顯王之世蜀王有褒漢之地因獵谷中與秦惠王遇惠王以金一笥遺蜀王王報珍玩之物物化爲土惠王怒群臣賀曰天奉我矣王將得蜀土地惠王喜乃作石牛五頭朝瀉金其後曰牛便金有養卒百人蜀人悅之使使請石牛惠王許之乃遣五丁迎石牛旣不便金怒遣還之乃嘲秦人曰東方收犢兒秦人笑之曰吾雖牧犢當得蜀也周顯王二十二年蜀侯使朝秦秦惠王數以美女進蜀王惑之故朝焉蜀王別封弟葭萌於漢中號苴侯命其邑曰葭萌焉苴侯與巴王爲好巴與蜀讎故蜀王怒伐苴侯苴侯奔巴求救於秦秦惠王方欲謀楚群臣議曰夫蜀西僻之國戎狄爲鄰不如伐楚司馬錯中尉田真黃曰蜀有桀紂之亂其國富饒得其布帛金銀足給軍用水通于楚有巴之勁卒浮大船舶以東向楚楚地可

得得蜀則得楚楚亡則天下并矣惠王曰善周慎王五年秋秦大夫張儀司馬錯都尉墨等從石牛道伐蜀蜀王自於葭萌拒之敗績王遜走至武陽爲秦軍所害其傳相及太子退至逢鄉死於白鹿山開明氏遂亡凡王蜀十二世冬十月蜀平司馬錯等因取首與巴焉周赧王元年秦惠王封子通國爲蜀侯

華陽志論曰蜀紀言三皇乘祗車出谷口秦宓曰今之斜谷也及武王伐紂蜀亦從行史記周貞王之十六年秦厲公城南鄭此谷道之通久矣而說者以爲蜀王因石牛始通不然也本紀旣以炳明而世俗間橫有爲蜀傳者言蜀王蠶叢之間周迴三千歲又云荆人鼈靈死死化西土後爲蜀帝周葺弘之血變成碧珠杜宇之魄化爲子鵲又言蜀推髻左衽未知書文翁始知書學按蜀紀帝

居房心決事參伐則蜀分野言蜀在帝議政之方帝不議政則王氣流于西故周失紀綱而蜀先王七國皆王蜀又稱帝此則蠶叢自王杜宇自帝皆周之叔世安得三千歲且太素資始有生必死死終物也自古以來未聞死者能更生當世或遇有之則爲怪異子所不言况能爲帝王乎碧珠出不一處地之相距動數千里一人之血豈能致此子鵲鳥今云是舊或曰舊周四海有之何必在蜀昔唐帝萬國時雍虞舜光宅八表大禹功濟九州后稷封殖天下井田之制庠序之教由來遠矣孔子曰述而不作信而好古竊比於我老彭則彭祖本生蜀爲殷太史夫人爲國史作爲聖則僊自上世見稱在昔及周之末服事于秦首爲郡縣雖濱戎夷亦有冠冕故蜀紀曰大人之鄉方大之國也至于漢興及當荒服而無



書學乎漢書曰郡國之有文學因文翁始若然翁以前齊魯當無文學哉

路史曰蜀之爲國肇於人皇其始蠶叢至魚鳧速蒲澤俾明時人民推結蓋蜀之先也昔黃帝爲其子昌意取于蜀山氏惟其後葉及高辛氏以其少子封蜀則繼之者也蜀今成都見楊子雲蜀紀

尋然蜀山氏女乃在茂詳後妃后國

羅氏論曰按諸蜀記杜宇末年遜位鼈令鼈令者荆人也舊說魚鳧畋于湔山仙去後有男子從天墮曰杜宇爲西海君自立爲蜀王號望帝徙都于郫或瞿上自恃功高諸王乃以褒斜爲門前熊耳靈關爲後戶玉壘峨眉爲城郭江濬綿洛爲池澤岷山爲蓄牧南中爲園苑時鼈令死尸隨水上荆人求之不得至蜀起見望帝

望帝以之爲相後禮以國去之隱於西山民俗思之時值二月田鵲方鳴因號杜鵑以志其隱去之期一云宇禮之而淫其妻恥之死爲子鵲故蜀人聞之皆起曰我望帝也杜甫每每起歎所謂杜宇曾爲古帝王者據風俗通等鼈令化從井出既死尸逆江至岷山下起見望帝時巫山擁江蜀洪水望帝令令鑿之蜀始陸處以爲刺史號曰西州自以德不如令從而禮焉是爲蜀開明氏年號萬通生蘆保亦號開明時武都出五力士輔之開明子孫八代都郫九世至開明尚始去帝號稱王治成都自開明五世至開明尚始立宗廟于蜀則猶在五帝時以今蜀記望帝遠記周襄王至鼈令王蜀十一代三百五十年當始皇明號蜀蘆子霸王夫始皇時蜀滅久矣記言儀錯伐蜀蜀王開明拒戰不利退走武陽獲之樂

史云在彭山縣則是張儀滅之也鼈水名也字一作鼈音別縣在  
泮河集韻音幣而刺史乃秦官故王充劉知幾以子雲之紀杜魄  
荆尸爲妄鼈令亦作鼈靈墓在郫西五里

鼈

路史曰蠶叢氏國今彭之導江有蠶厓而漢之蠶陵縣在翼之翼  
水縣西有蠶陵山

翼

路史曰今雙流縣南十八里有瞿上城益之西南二十里縣北有  
瞿上鄉

導江

路史曰魚鳧治導江今眉之彭山縣北東二里有白鳧津南北八

郡志云犍爲有魚鳧津廣數百步

郫

郡守治

苴

華陽國志曰蜀王別封弟葭萌於漢中號苴侯命其邑曰葭萌焉

隨

左傳桓公六年春楚武王侵隨使遽章求成焉軍於瑕以待之隨  
人使少師董成鬬伯比言於楚子曰吾不得志於漢東也我則使  
然漢東之國隨爲大隨張必棄小國小國離楚之利也少師侈請  
羸師以張之能率且比曰季梁在何益鬬伯比曰以爲後圖少師  
歸請從楚師隨侯將許之季梁止之曰天方授楚楚之羸其誘我  
也君何急焉君姑修政而親兄弟之國庶免於難隨侯懼而修政

楚不敢伐八年隨少師有寵楚鬬伯比曰可矣雖有隙不可失也  
夏楚子合諸侯于沈鹿黃隨不會楚子伐隨軍于漢淮之間季梁  
請下之弗許而後戰所以怒我而怠寇也少師謂隨侯曰必速戰  
不然將失楚戰于速杞隨師敗績隨侯逸鬬丹獲少師秋隨及楚  
平楚子將不許鬬伯比曰天去其疾矣隨未可克也乃盟而還十  
一年春楚屈瑕將盟貳軫鄖人軍於蒲騷將與隨絞州蓼伐楚師  
莫敖患之鬬廉曰若敗鄖師四邑必離遂敗鄖師于蒲騷卒盟而  
還莊公四年春二月楚武王荆尸授師了焉以伐隨將濟入告夫  
人鄧曼曰余心蕩遂行卒於櫛木之下令尹鬬祈莫敖屈重除道  
梁嗟營軍臨隨隨人懼行成莫敖以五命入盟隨侯且請爲會於  
漢汭而還濟漢而後發喪

史記楚武王卽位之三十五年伐隨隨曰我無罪楚曰我蠻夷也  
今諸侯皆爲叛相侵或相殺我有敝甲欲以觀中國之政請王室  
尊吾號隨人爲之周請遵楚王室不聽還報二十七年楚熊通怒  
曰吾先鬻熊文王之師也早終成王舉我先公乃以子男田令居  
楚蠻服皆率服而王不加位我自尊耳乃自立爲武王與隨人盟  
而去於是始開濮地而有之五十一年周召隨侯數以立楚爲王  
楚怒以隨背已伐隨武王卒師中而兵罷  
春秋僖公二十年冬楚人伐隨

左傳隨以漢東諸侯叛楚鬬穀於菟帥師伐隨取成而還君子  
曰隨之見伐不量力也

張氏曰楚力方強隨欲復漢東諸侯于中國而德不足以勝之

此所以召兵而自屈也

廬陵李氏曰隨本漢東姬姓國桓公六年楚武王侵隨鬬伯比曰漢東之國隨為大云想此時隨尚能率小國以拒楚而漢陽諸姬尚聽命於隨也八年而敗於速杞十一年而隨絞州蓼又欲伐楚師卒以鄖師之敗而止至莊四年楚武王伐隨而卒隨人成楚文即位不復有事於隨蓋隨已屈服於楚也

左傳定公五年吳破楚入郢鬪辛與其弟巢以楚王奔隨吳人從之謂隨人曰周之子孫在漢川者楚實盡之天誘其衷致罰於楚而君又竄之周室何罪君若惠顧周室施及寡人以獎天衷君之惠也漢陽之田君實有之楚子在公宮之北吳人在其南子期似王昭王兄公逃王而已為王曰以我與之王必免隨人卜與之不

吉乃辭吳曰以隨之辟小而密邇於楚楚實存之世有盟誓

今未改若難而棄之何以事君執事之患不唯一人一人楚王若鳩楚

竟敢不聽命鳩集也吳人乃退鑑金初宦於子期氏實與隨人要言

要言毋以王與晏并脫子期王使見王喜欲引見辭曰不敢以約為利約為要言也

王割子期之心以與隨人盟

春秋哀公元年春王正月楚子陳侯隋侯許男圍祭

杜氏曰隨國義陽隨縣隨世服於楚不通中國吳之入楚昭王奔隨隨人免之卒復楚國楚人德之列於諸侯故見經

路史曰李白送倩公序云漢東之國神農之後季良為大賢而世以為姬姓失之今隨之隨縣晉之隨郡有蚺丘隨侯臺墓

卮言曰舊說以隨為姬姓國而羅氏引李白序謂是神農之後既

系之姜又系之姬兩無據矣今亦莫辨其的系而詳錄其事於此  
章云隨初能抗楚卒能免楚漢東諸侯無如隨之久存者是亦非  
弱國也而其滅亡時不可考矣按志今湖廣隨州有隨城山

葛

尚書仲虺之誥曰乃葛伯仇餉初征自葛

孟子湯居亳與葛爲鄰葛伯放而不祀湯使人問之曰何爲不祀  
曰無以供犧牲也湯使人遺之牛羊葛伯不祀湯又使人問之曰  
無以供粢盛也湯使亳衆往爲之耕老弱饋食有童子以黍肉餉  
葛伯殺而奪之書曰葛伯仇餉

春秋桓公十五年夏五月邾人牟人葛人來朝

路史曰郡國志高陽有葛城今鄭西北有葛鄉城一名依城漢高  
陽地然葛鄉故葛城乃在寧陵北十五里鄆城北三十里周四里  
去亳城百里卽葛伯國非嬴姓之葛

卮言曰或云餉卽向國也葛伯仇餉猶密人侵阮云爾按志今河  
南寧陵縣古葛伯國春秋時猶有葛國與邾人牟人並稱地亦相  
近則湯之伐葛固未取也路史紀葛天氏有葛氏矣而系葛伯於  
黃帝後國又嬴姓亦有葛其地各殊按葛天之世遠不可考而傳  
言黃帝二十五宗無所謂葛者今系之此章

歸

路史曰歸一曰夔杜甫所謂夔子國者春秋之夔子則楚之分蓋  
楚并夔而封其別也

卮言曰史記云垂益夔龍不知所封左傳云后夔之子伯封爲羿

所滅夔是以不祀後世遂謂夔無後按唐虞之時如稷契伯夷皆有封國豈夔獨無且夔與稷俱稱后矣安得無國路史謂歸即夔之封得之夔與歸聲相近今四川之夔府與湖廣之歸州地亦相近豈后夔本封于夔也楚滅之以封其子摯而后夔之後則處於歸耶王符云歸姓胡有何魯昭公之母曰胡女敬歸則胡為歸姓明甚是非夔後耶媯歸聲亦相近或混為一而路史於胡有何三國亦兩存之蓋疑而未決按春秋傳既有戴媯息媯又有陳媯王姚俱為王后皆舜後也復合之於歸豈一族有三姓乎路史既以春秋之胡子為姬姓國矣又有胡女敬歸為歸姓國或因陳胡公以胡為媯姓豈胡有三姓乎蓋胡公者虞公而胡諡也媯歸之誤以此後學孰正之哉然傳云虞皋能聽協風以作樂而舜賡歌風動又命夔典樂至於儀鳳舞獸則其世審樂律同出一祖未可知也今斷以歸為夔封胡為歸姓而於媯姓之條不復見焉夔既有後而傳云不祀蓋就伯封而言猶六蓼之滅而云臯陶庭堅不祀皆以冢君承祀故國滅則祀絕也

封

左傳叔向曰昔有仍氏生女黥黑而甚美光可以鑑名曰玄妻樂正后夔取之生伯封實有豕心貪惓無厭忿類無朋謂之封豕有窮后羿滅之夔是以不祀

金氏云左氏所載伯封之事似失之誣

羅氏曰禹命伯封叔及昭明作行曆歲紀甲寅敬授人時則伯封夏之天官仲康征羲和而夷羿滅伯封是與王室爭諸侯耳

圭

路史曰鄭穆妃主媯國後爲邾秦武公十年代邾戎置下邾縣今華陰有下邾天水有上邾故城在城紀在邾山

胡

劉向說苑曰鄭武公欲伐胡問群臣國孰可伐者關其思曰胡可伐公曰胡兄弟之國也子言伐之何也遂戮關其思其後伐胡克之

春秋昭公二十三年秋七月吳敗頓胡沈蔡陳許之師于雞父胡子髡沈子違滅獲陳夏齧

左傳吳伐州來楚師及諸侯之師救之戰于雞父吳獲胡沈之君

胡傳胡沈書爵書名書者若曰非有能滅之者咸其自取焉耳亦猶梁亡自亡也鄭棄其師自棄也或曰滅或曰獲別君臣君死曰滅胡子沈子是也

定公四年春三月公會劉子晉侯宋公頓子胡子滕子薛伯于召陵侵楚

左傳吳之入楚也胡子盡俘楚邑之近胡者楚既定胡子豹又不事楚曰存亡有命事楚何爲多取費焉二月楚滅胡

胡傳國君造命不可委命者旣以爲有命而又貪生忍辱不死于社稷則是不知命矣書以歸罪豹之不能死位而與歸也故楚子書爵而胡子書名

家氏曰召陵之會頓胡之君皆在曰以侵楚也是後楚有吳患不能報去年滅頓今年滅胡所以報召陵之怨蓋不能報之於

中國而吞噬小國以快其宿憾也

路史曰鄭伐胡武公曰胡兄弟之國也昭公二十三年吳敗胡師胡子髡滅定公十五年楚方滅胡以胡子豹歸相去二十五年蓋楚之所立盟會圖云胡在豫之鄆城是也范史云汝陰本胡國杜云在汝陰西北今潁治汝陰西二里有故胡城胡有胡陰胡陽又九域志開封有陳胡公廟胡公本媯姓與春秋之胡子異越世家云析酈宗胡索隱云宗胡邑也爲胡姓之宗

又曰王符云歸姓胡有何世本左傳皆云胡子國歸姓歸姓胡出卮言曰左傳齊晏孺子之母曰胡姬說苑鄭武公云胡兄弟之國則胡姬姓也而王符云歸姓胡有何魯定公之母曰胡女敬歸之姊齊歸是歸姬皆有胡矣諸傳皆以汝陰爲胡子國而路史謂是陳胡公之國胡子國乃在鄆城似爲有據然胡有何三國旣系舜後又系夔後則亦未定之論按詩云似爾兄弟詢爾仇方夫所謂兄弟國者與國云爾豈必同姓而春秋之胡子傳無明文安知其必爲姬姓乎若陳胡公媯姓非歸也胡公宜爲號謚耳

有  
路史曰有有子也有九委音故本一作洧宛地今開封扶溝有洧水有曲洧城

何  
路史曰虞帝末何侯得道於九疑今道之寧遠廣濟鄉有何亭墟然伯陵同何女緣婦則何姓黃帝時已見矣又泗州僧伽傳云僧伽何國人世謂不知爲何國人按西域有何國見隋書



息

左傳隱公十一年鄭息有違言息侯伐鄭鄭伯與戰于竟息師大敗而還君子以是知息之將亡也不度德不量力不親親不徵辟不察有罪犯五不韙而以伐人其喪師也不亦宜乎

又傳莊公十年蔡哀侯娶于陳息侯亦娶焉息媯將歸過蔡蔡侯曰吾媯也止而見之弗賓息侯聞之怒便謂楚文王曰伐我吾求救于蔡而伐之楚子從之秋九月楚敗蔡師于莘以蔡侯歸十四年七月蔡哀侯為莘故繩息媯以語楚子楚子如息以食入享遂滅息以息媯歸

國語曰息之亡也由陳媯

路史曰楚文妃息媯國杜預以為姬姓之息非也漢為新息縣後周於新息置息州隋大業中廢為縣今蔡之新息北三十里有古息城西十里有息侯廟然春秋別有息字書鄭齊附庸今齊南鄭卮言曰路史系息於媯然傳云息侯娶於陳故曰陳媯亦曰息媯則息侯之國亦不必為舜後也故系之此章

賴

春秋昭公四年

癸亥

秋七月楚子蔡侯

凡八諸侯

伐吳遂滅賴

公穀作厲

左傳楚子以諸侯伐吳遂滅賴賴子面縛銜璧士袒輿櫬從之造於中軍王問諸椒舉對曰成王克許許僖公如是王親釋其縛受其璧焚其觀王從之遷賴於鄢楚子欲遷許於賴使鬬韋龜公子棄疾城之而還

啖氏曰左氏云賴子面縛楚子焚櫬按經但言滅是死位也他

年賴降而舍之故誤耳

路史曰賴國子爵蔡之褒信有賴亭楚滅之昭四年非炎帝後賴春

秋滅賴古本作厲故世以為即厲非也晉志厲賴二國又哀安

孺子如賴乃齊也

卮言曰一統志河南新息縣古賴國

洛

書五子之歌曰太康尸位盤遊無度畋于有洛之表十旬弗反有

窮后羿因民弗忍距于河

竹書夏帝芬十六年洛伯用與河伯憑夷鬪又帝癸二十一年

商師征有洛克之

逸書史記解曰昔者有洛氏宮室無常池園廣大工功日進以後

更前民不得休農失其時饑饉無食成商伐之有洛以亡

路史曰有洛洛也又商州上洛郡治上洛晉地竹書紀年晉烈公

三年楚人伐我南鄙至于上洛漢屬弘農唐洛州

河

竹書夏帝泄十六年殷侯微以河伯之師伐有易殺其君綿臣

胡氏應麟曰注云殷侯子亥賓于有易而淫焉有易之君綿臣殺

而放之故殷上甲微復興故殷人報焉按此則河伯為當時諸侯

觀注文益明或以為治河之官亦近之然治河之官不得有師旅

假人或以諸侯治其事而封之為河伯也然則憑夷非諸侯之名

何哉

穆天子傳曰天子西征驚行至于陽紆之山河伯無夷即憑夷也之所

都居是惟河宗氏

河四瀆之宗主河者因以為氏

河宗伯天逆天子燕然之山勞

用束帛加璧天子使郟父受之命吉日戊午天子大服冕褱鞶帶

指芻奉璧南面立于寒下曾祝佐之官人陳牲全五具天子授河

宗璧河宗伯天受璧西向沉璧于河再拜稽首祝沉牛馬豕羊河

宗復命于天子河伯號之帝曰穆滿女當永致用晉事南向再拜

河宗又號之帝曰穆滿示女春山之瑤

河伯以河神命再呼穆王再拜以名應謙也

乃至

於昆侖之丘以觀春山之瑤伯天皆致河典乃乘渠黃之乘為天

子先以極西土天子西濟于河爰有温谷樂都河宗氏之所遊居

伯天之別州邑

天子屬官放器乃命正官郊父受敕憲

自此西征次車之乘柏天主尊天

子南還至于陽紆之東尾河伯之孫有模董其葉是食明后天子

嘉之賜以佩玉一隻伯天再拜稽首天子東征柏天送天子至于

鄘人斲多之汭河水之所南還曰天子五日休于澡澤之上戊午

天子東征顧命柏天歸于丌邦天子曰河宗正也柏天再拜稽首

胡氏應麟曰離騷南華竝有河伯之文然皆寓言也山海經以竹

書所謂河伯當之于是馮夷易曰冰夷博物志又以人首魚身擬

之遂益誕漫亡稽據竹書河伯自為諸侯而馮夷為諸侯姓名余

別有辨而傳載河宗伯天尤詳蓋穆王登春山觀昆侖玄圃皆柏

天為之前導又乘穆王副車馳驅千里使其果人首魚身穆王將

畏避不暇而能與之同載極西土而後返耶傳稱柏天為河伯之

孫蓋馮夷之後世為諸侯以職河任者于離騷南華之河伯迴不

侔也

胤

夏書胤征曰惟仲康肇位四海胤侯命掌六師羲和廢厥職酒荒于厥邑胤侯承王命徂征

集傳仲康太康之弟胤侯胤國之侯命掌六師命爲大司馬也仲康始卽位卽命胤侯以掌六師次年方有征羲和之命林氏曰羿廢太康而立仲康然其篡也乃在相之時仲康不爲羿所篡至其子相然後見篡是則仲康猶有以制之也羲和之罪雖曰沉亂于酒然黨惡於羿故胤侯承王命往征之以剪羿羽翼故終仲康之世羿不得以逞曰胤后者諸侯入爲王朝公卿如禹稷伯夷謂之后也或曰蘇氏以爲羲和貳於羿心於夏者故羿假仲康之命命胤侯征之今詳文意蓋史臣善仲康能命將遣胤侯之爲專征也

路史曰夏胤侯國今利之胤山乾德三年平蜀天寶元年胤山

舞衣今川有胤氏嗣氏

粗

左傳魏莊子曰夏之方衰也后羿自粗遷於窮石

路史曰粗羿邑澶之衛南縣東十五有故粗城一曰外里襄十一年城粗者邑界宋魯

卮言曰詩云侵阮徂共鄭氏曰阮也徂也共也三國犯周而文王伐之孔氏曰魯詩亦以阮徂共皆爲國名豈卽此粗歟地在今徐州沛縣境

窮

路史曰有窮羿邑楚地今壽之安豐有窮谷窮水卽窮石故記皆

謂刪丹蓋以淮南子弱出窮石窮石山在刪丹今在張掖似大遼  
隔楚人救潛沈尹戌與吳師遇于窮潛今之舒與寒過皆相邇因  
夏民代夏政則此為近

寒

左傳魏莊子曰寒浞伯明氏之讒子弟也伯明后寒棄之夷羿收  
之信而使之以為已相八年殺羿而代之浞因羿室生澆及豷  
路史曰寒浞邑樂史云伯明氏所立本國世本云邳姓今濰之北  
海東二十三里寒亭非晉寒

過

左傳曰澆既長矣浞乃使之用師滅二斟而弑夏后相乃處澆于  
過處豷于戈

又伍員曰昔有過澆殺斟灌以伐斟尋滅夏后相其後少康使女  
艾澆澆季杼誘豷遂滅過戈

竹書帝相八年寒浞殺羿使其子澆居過甲辰夏世子少康使汝  
艾伐過殺澆

路史曰今萊之掖西北二十有過鄉過亭

戈

竹書帝相二十年寒浞滅戈使其子甲辰少康伯子伯杼帥師滅

武

左傳曰羿棄武羅伯因熊困龐圍而用寒浞

路史曰世本云夏武羅國冀都之武邑一云衛北境武父陳留有

武父城

扈

路史曰扈國莒邑有大扈宜出扈降

鬲

左傳魏莊子曰夏之舊臣靡自有鬲氏收二國之燼以滅浞而立少康

竹書帝相二十八年卯乙寒浞使其子澆弑帝后緡歸于有仍伯靡

出奔鬲甲辰伯靡自鬲師斟灌斟鄩之師以伐浞殺之

路史曰有鬲氏夏諸侯今德之安德西北有故鬲城卽有鬲漢之

鬲縣應氏以爲偃姓皐後酈氏以爲有窮后國俱非

女

竹書世子少康使女艾伐過殺澆

書序曰伊尹醜夏復歸于亳遇汝鳩汝方

竹書夏帝癸二年伊尹歸于商及女鳩女方會于北門

路史曰女艾國汝也商有女鳩今之臨汝一云晉之汝濱本陸渾

地晉取之

鬼方

史記帝顓頊之孫曰陸終娶于鬼方氏是謂女濱

易既濟曰九三高宗伐鬼方三年克之小人勿用

本義既濟之時以剛居剛高宗伐鬼方之象也三年克之言其

久而後克戒占者不可輕動之意

又未濟曰九四貞吉悔亡震用伐鬼方三年有賞于大國

傳九雖易而居四故戒以貞則吉而悔亡不貞則不能濟有悔

者也震動之極也古之人用力之甚者伐鬼方也至于三年然後成功而行大國之賞必如是乃能濟也

竹書武丁三十二年伐鬼方次于荆三十四年王師克鬼方氏羌來賓武乙三十五年周公季歷伐西落鬼戎

成都楊氏曰高宗伐鬼方之事惟見於易鬼方極遠之國卽莫靡之屬也蒼頡篇曰鬼之爲言遠也世本黃帝娶於鬼方

漢匡衡

疏云成湯化異俗而懷鬼方意者湯時鬼方已內屬於式圍之中而復叛於中衰之日故高宗伐之以中興殷道也又西羌傳曰殷室中衰諸侯背叛至于武丁征西戎鬼方三年乃克故其詩曰自彼氏羌莫敢不來王是其證也竹書紀年周公伐西洛鬼戎按今貴州有羅鬼夷俗又呼貴州爲鬼州楚詞得人肉而祀以其骨爲

醢紂醢脯九侯亦效夷虐也今貴州以牛馬骨漬之經年候其柔

脆如筭其氣逆於人鼻以爲上品供客謂之賈鬼

賈閣上聲

亦此類也

胡氏應麟曰鬼方事見竹書高宗三十四年伐鬼方次于荆三十

四年王師克鬼方氏羌來賓甚明鬼戎之語絕無所出史稱陸終

氏娶於鬼方生六子卽昆吾大彭五霸迭王者見鄭氏通志略所

引楊云黃帝未知何所據也鬼方前輩有以爲楚者以楚俗尚巫

巫故謂鬼方竹書伐鬼方之上有次荆之文則此說宜可證楊云

極遠恐未然又一說以卽貴州黔中然秦始置黔中周世何能至

此蓋當時楚地亦極爲蠻落春秋始會盟中國耳

以鬼方爲楚見蔡介夫蒙引

卮言曰楊氏以鬼方爲今貴州其說有據謂極遠者自貴州西南距中國當時亦可謂遠矣鬼戎亦出竹書而胡氏不考謂其語無

出以關楊非也路史記有九侯鬼侯又有鬼方詳考諸傳九在湯陰而鬼方為遠國固非一族然所謂鬼侯者亦安知非鬼方之後乎或其遷居內地而又以鬼為九也故并系之

九

史記曰紂以西伯昌九侯鄂侯為三公九侯有好女入之紂九侯女不意淫紂怒殺之而醢九侯鄂侯爭之疆辨之疾并脯鄂侯西伯昌聞之竊歎崇侯虎知之以告紂紂囚西伯姜里

徐廣曰九侯一名鬼侯鄴縣有九侯城

索隱曰九亦依字讀鄒誕生音阮也

竹書帝辛元年命九侯周侯邳侯

正義曰括地志云相州谷陽縣西南五十里有九侯城亦名鬼侯城蓋殷時九侯城也

逸書明堂解曰大維商紂暴虐脯鬼侯以享諸侯天下患之

凌氏曰呂氏春秋云紂為無道殺梅伯而醢之殺鬼侯而脯之

又淮南云醢鬼侯之女菹梅伯之骸蓋鬼侯即九侯也

路史曰紂三公即九侯彪云鄴西鬼侯國也隋圖經臨水縣九侯

城今相之隆陽有九侯城

磁之滄陽西南五十

誕生音仇故或謂即阮非

又曰黃帝臣鬼容區國商有鬼侯即九侯今漳浦有鬼侯山亦曰九侯山谷云山魃之居圖經又謂少康九子之居皆妄

成都楊氏曰漢書藝文志鬼谷區三篇注即鬼史區也郊祀志黃

帝得寶鼎鬼侯問於鬼史區云注即鬼容區容史聲相近今按

鬼谷即鬼容者又字相似而誤也

梅



路史曰梅伯爵寰宇記云梅伯國九域志云殷伯紂所滅今譙南四十有故梅城河南密縣有梅山集韻音每

姜

路史曰姜里地在相音九或卽九字書音牖失之元和志牖里一名姜城湯陰北九里通典相州湯陰姜里城隋圖經湯陰有防城紂囚文王築此防之

邠

路史曰邠侯亦紂三公

昭十四晉施邠侯音邠作邠訛

或云卽鄂一云邠侯俱非

按世紀邠侯事紂以忠諫死而邠爲文王所伐文王豈伐賢哉

邠見

武穆中

卮言曰左傳晉邠侯與雍子爭鄆田邠侯殺雍子晉施邠侯終史

以邠爲刑當必有據然恐非昔之邠矣詳列國分采

豐

路史曰豐也豐侯事紂韓子云文王侵孟克莒舉豐三舉而紂惡之春秋徐之豐縣又楚地

蒙山

竹書帝癸十四年扁帥師伐岷山

一作山民

沈注曰癸命扁伐山民山民女子桀二人曰琬曰琰

國語史蘇曰昔夏桀伐有施有施人以妹喜女焉

胡氏大紀曰桀伐蒙山有施氏有施氏進女妹喜桀王嬖之

路史曰桀伐蒙山氏卽岷山氏今蒙州蒙山郡非晉陽之蒙山

庸

周書泰誓曰王曰嗟我友邦冢君及庸蜀羌髡微盧彭濮人

集傳武王伐紂不期而會者八百國今誓師獨稱八國者蓋八國近周西都素不服乃受約束以戰者若友邦冢君則泛指諸侯而誓者也

史記楚世家曰熊渠當周夷王之時甚得江漢間民和乃與兵伐庸

正義曰括地志云房州竹山縣本漢上庸縣古之庸國

春秋文公十六年

楚莊三年庚戌

秋八月楚人秦人巴人滅庸

左傳楚大饑戎伐其西南至于阜山師于大林又伐其東南至于陽丘以侵訾枝庸人帥群蠻以叛楚麇人帥百濮聚於選將伐楚於是申息之北門不啓楚人謀徙於阪高爲賈曰不可也

能往寇亦能往不如伐庸夫麇與百濮謂我饑不能師故伐我也若我出師必懼而歸百濮離居將各走其邑誰暇謀人乃出師旬有五日百濮乃罷自廬以往振廩同食次于句瀝使廬戢黎侵庸及庸方城庸人逐之囚于揚窻三宿而逸曰庸師衆群蠻聚焉不如復大師且起王卒合而後進師叔曰不可姑又與之遇以驕之彼驕我怒而後可克先君蚡冒所以服陘隰也又與之遇七遇皆北唯裨儵魚人實逐之庸人曰楚不足與戰矣遂不設備楚子乘驛會師于臨品分爲二隊子越自石溪子具自仞以伐庸秦人巴人從楚師群蠻從楚子盟遂滅庸

胡傳庸幸楚弱帥羣蠻以叛楚此取滅之道也楚人謀徙於阪高爲賈曰不如伐庸亦見其謀國之善矣故列書三國而楚不

稱師滅楚之罪詞也

卮言曰楚率秦巴以滅庸則秦又聽服於楚矣此春秋所以列

書三國胡傳謀國之善而滅其罪恐非春秋本旨

左傳壬寅楚共王卒吳侵楚子庚戰於庸浦大敗吳師

寰宇記曰上庸故城在州西二百五十里楚子為庸浦之役者

路史曰庸氏伯爵助武王伐紂今房之竹山漢之上庸說襄十三

蜀地文邠南夷國寰宇記金州周庸國地戰國時為楚附庸後滅

之楚使盧戢黎侵庸有裨儵魚二邑

卮言曰一統志今湖廣竹山縣有庸山

魚

左傳文公十九年庚戌秋庸人帥群蠻以叛楚楚師伐庸七遇皆

北唯裨儵魚人實逐之庸人遂不設備

路史曰魚人逐楚師者長楊之魚城也長楊西北五十四面險絕舊云魚復通

夔州春秋魚國也然魚復之名始於世即魏禪儵魚庸之三邑之魚復故城在州四十五里沔陽東十五里

儵

左傳文公十七年辛亥六月晉侯不見鄭伯鄭子家與晉書曰將

悉索敝賦以待于儵鄭樵云晉鄭之竟

髻

集傳庸濮在江漢之南羌在西蜀髻微在巴蜀盧彭在西北

微

卮言曰商有微子傳謂畿內國也然武王伐紂有微人從之是名

同而地殊也

瀘

路史曰盧戎也古文作縕齊之長清南五十有盧城齊鄭尋盧之盟者然非此記每為廬今襄之中廬寰宇記曰中廬廬戎國文十六年楚師伐庸自廬以往者

卮言曰左傳楚伐庸自廬以往又楚伐羅羅與廬戎兩軍之是廬與廬戎為二而寰宇記合之非也故路史系廬於媯後而系廬於此章是得之矣又引寰宇記之說何也按庸蜀彭濮俱在四川雲南之間則廬戎當即是今四川之瀘州

彭

蘇氏書傳曰彭今屬武陽有彭山

路史曰黔之彭水縣又在彭溪在忠之臨江卽巴賓彭濮者非涿陽矣

薄姑

書序曰成王既踐奄將遷其君於蒲姑周公告召公將作蒲姑竹書武王十六年秋王師滅蒲姑成王三年王師滅殷遂伐奄滅蒲姑五年春王入奄遷其君于蒲姑

路史曰薄姑商諸侯卽薄丘一曰蒲姑在青之博興地志有薄姑城在臨淄西北五十里杜云蒲姑城在樂安隋博昌北唐博興也書圖經云與四國作

亂成王滅之以封太公按史記則胡公徙之左傳晏子云爽鳩氏始居此地季則因之逢伯陵因之蒲姑氏又因之而後太公因之爽鳩太昊時季則夏季而伯陵薄姑商末也然太公實居營丘非此

厄言曰蒲姑即薄姑其為齊地明甚而李氏杞書序注云貴州千乘縣有薄姑城不知何據按志今山東博興縣古薄姑

落姑

路史曰按春秋傳落姑齊地

閔元年或云魯地魯大夫采

姓書落姑氏

蒲侯

左傳襄公二十二年與莒子遇蒲侯氏預云邑名

蒲如

路史曰蒲如商侯國齊地有蒲如氏預云下邳取慮東南有蒲如城春秋蒲隧或云即薄姑蓋其分也

姑幕

路史曰姑幕商侯國今密之莒東北百六十有姑幕故城故晉琅

邪姑幕縣後齊併入東莞晉志通典十道記等俱謂即蒲姑蓋非樂史以為薄姑氏國與四國亂周公滅之以封太公又云青之博昌界有薄姑城是亦一也按書大傳謂奄君薄姑語錄父舉事以薄姑為名誤矣傳所謂薄姑商奄吾西土者豈惟晏子之言哉

崩

穆傳曰天子西征至于鄆人河宗之子孫鄆伯絮且逆天子于智之先豹皮十良馬二六天子使井利受之丙午天子飲于河水之阿天子屬六師之人于鄆邦之南濬澤之上天子西征南還柏天送天子至于鄆人鄆伯絮觴天子于澡澤之上

路史曰崩備也穆傳天子西征至于崩崩伯縻逆天子鄆區肯切伯爵縻名廣韻上聲引之云漢有崩城侯又步登切故楚漢春秋

作憲城又作馮馮朋通也地記陳倉有蒯城云河宗之子孫則宜  
在此非沛之蒯姓纂作蒯伯縻穆傳全作蒯伯絮訛

蒯

路史曰說文沛城父有蒯鄉玉篇蒲梅切蘇林廣韻為薄回切云  
鄉名在右扶風集一作蒯又音浮顏為薄肯切則又誤矣姓纂蒯  
氏以為出伯縻國在虞芮間者妄或作邨非諸蒯蒯蒯蒯字並詳字經

蒯

路史曰蒯是春秋蒯得之先訛為蒯苦怪切括地志河南縣西四  
十里有蒯亭縣今有蒯鄉玉篇說文蒯從蔽省汝南安陽鄉名或  
作蕢

卮言曰一統志云河南洛陽縣舊有蒯鄉

陵

穆傳天子四日休于濩澤陵翟隗姓國也致賂良馬百駟歸畢之寶  
取畢國之寶今歸之以詰其成陵了音胡陵子束牲天子西遊東還宿于  
昉畢人告戎曰陵翟來侵天子使孟愈如畢討戎

邾

春秋莊公元年戊子冬十月齊師遷紀邾邾部

穀梁傳紀國也邾邾部亦國也或曰遷紀于邾邾部  
公羊傳遷之者何取之也取之則曷為不言取之為襄公諱也  
外取邑不書此何以書大之也何大爾自是始滅也

路史曰邾本紀邑有邾故城在青

廬陵李氏曰圖經書遷人國邑三齊師遷而邾邾部十年宋人遷

宿閔二年齊人遷陽是也宿與陽皆國而邢鄆部為紀邑遷宿  
遷陽皆書人而遷三邑書師此春秋特筆著齊之罪也諸傳以邢鄆部

為紀邑又以部鄆為邾邑皆誤

劉氏曰齊一師必不能並遷兩國取部取防猶分別言之况兩國乎

厄言曰齊一師而遷四國著齊之以強凌弱也當從穀梁之說若謂齊師不能並遷兩國何以能遷三邑乎

部

路史曰昭十一年鄆魯地舊云都昌西之訾城詳楚後皆

厄言曰一統志今山東昌邑縣

部

路史曰密之安丘西南六十里故部城漢部縣杜云十縣南又朱

隋之部縣唐武德中併文七年五梧紀邑後屬魯南與邾境莊元齊遷莒邢鄆部凡

書遷者自是滅矣

厄言曰今山東泗水縣有部鄉

部

春秋襄公十三年辛丑夏取部

左傳夏部亂分為三師救邾遂取之凡書取言易也

杜氏曰邾小國任城亢父縣有邾亭

公羊傳詩者何邾婁之邑也曷為不繫乎邾婁諱亟也

高氏曰魯乘亂滅之以為附庸不言滅者內大惡故婉其辭也

劉氏曰左氏云凡書言易非也春秋褒善貶惡難易何足記乎

汪氏曰公羊以邾為邾邑然不書伐邾則非邾邑明矣  
路史曰詩邾也魯取之預云亢父有邾亭亢父隸濟說文附庸國  
漢志詩亭詩國水經云春秋詩國也在任城界晉樂盈克邾乃齊  
地例云平陰城西有邾山

卮言曰一統志今山東濟陽縣古邾國

鄆

春秋成公六年丙子春二月取鄆

杜氏註曰鄆附庸國

胡傳鄆微國也書取者滅之也滅而書取為君隱也項亦國也  
其書滅者以僖公在會季孫所為故直書其事而不隱

王氏曰公羊於根上鄆邾皆曰邾邑然春秋未有取他國之地

而不係國者苟以諱亟而不繫邾則僖公取須句此言嘗婁可  
謂亟矣何以繫之邾耶

廬陵李氏曰鄆為微國左氏穀梁同公羊以為邾邑非春秋內  
滅國書取者三此年取鄆襄十三年取邾昭三年取鄆皆諱詞

桐

左傳定公二年癸巳夏四月桐叛楚吳子使舒鳩人誘楚人曰以  
師臨我我伐桐為我使之無忌秋楚伐吳師于豫章吳人敗之遂  
圍巢克之

杜氏曰桐小國廬江舒縣西南有桐鄉

正義曰桐小國世屬於楚桐今叛楚楚有間隙故吳子因是而謀  
之舒鳩自是楚之屬國居吳楚之間亦兩取其意故意吳得使之



也

路史曰今舒之桐城西南有桐亭有漢桐鄉

於餘丘

春秋莊公二年丑夏公子慶父帥師伐於餘丘

杜氏曰於餘丘國名也為邾所并

正義曰公羊穀梁皆以於餘丘為邾之別邑左氏無傳正以春

秋之旨未有伐人之邑而不繫國者此無所繫故知是國釋例

註闕不知其處蓋近魯小國也

路史曰餘丘二傳以為邾邑然伐不繫邾魯叛邑也邑不言伐

陽樊

左傳隱公十年己巳冬王與鄭人蘇忿生之田緝樊等邑僖公二

十五年丙戌春晉侯將納王舜秦師而次于陽樊右師圍温左

師逆王四月丁巳王入于王城晉王朝王請隧弗許與之陽樊温

原攢茅之田晉於是始起南陽陽樊不服圍之蒼葛呼曰德以柔

中國刑以威四夷宜吾不敢服也此誰非王之親姻其俘之也乃

出其民

杜註曰樊一名陽樊野王縣西南有陽城

盟向

左傳隱公十一年庚午秋桓王與鄭人蘇忿生之田十二邑温原

緝樊陽郟攢茅向盟州陘潰懷君子是以知桓王之失鄭也已弗

能有而以與人人之不至不亦宜乎桓公八年丁丑夏盟向求成

于鄭既而背之秋鄭人齊人衛人伐盟向王遷盟向之民于郟

杜註曰盟今盟津向今軹縣西有地名向此盟向之民必有主據傳言求成于鄭是主求成也王以與鄭傳稱王不能有然則鄭雖得之亦不能有故今始求成既而背之是背鄭歸王故王遷于邲若主不歸王則王無由得遷之也

卮言曰按杜氏以盟向為二據傳文是一邑

零支

路史曰齊桓公北制零支今北平之盧龍故零支縣故離支也

卮言曰一統志云今直隸永平府古今支

鍾吾

左傳昭公二十七年丙戌夏吳王僚使公子掩餘公子燭庸圍潛而闚廬使鱣設諸弑王僚掩餘奔徐燭庸奔鍾吾己丑秋吳王使

徐人執掩餘使鍾吾人執燭庸二公子奔楚十二月吳子執鍾吾子遂伐徐滅之

路史曰鍾吾一作鍾吳春秋鍾吳子國昭二吳滅之預云泗之宿

遷西北十里司吾故城是寰宇峒為鍾吾氏漢尉氏令

鮮虞

春秋昭公十三年冬十月晉伐鮮虞

左傳十二年晉荀吳偽會齊師者假道於鮮虞遂入昔陽秋八月壬午滅肥是年伐鮮虞因肥之役也

穀梁傳其曰晉狄之也不正其與夷狄交伐中國故狄稱之

程子曰晉假道於鮮虞而遂伐之見利忘義夷狄之道也

常山劉氏曰晉中國也鮮虞夷狄也晉悖中國之道反行夷狄

之道故書晉以狄之

十五年晉荀吳帥師伐鮮虞

陳氏曰常狄晉矣則荀吳何以無貶於初伐貶餘實錄而已爾

左傳定公二年九月鮮虞人敗晉師于平中獲晉觀虎

春秋定公四年秋晉士鞅衛孔圉帥師伐鮮虞

左傳春劉文公合諸侯于召陵謀侵楚也晉荀寅言於范獻子

曰國家方危諸侯方貳中山不服棄盟取怨無損於楚而失中

山不如辭蔡侯乃辭蔡侯晉於是乎失諸侯

襄陵許氏曰謀楚而不能討盟蔡而不能救惟中山是伐書帥

與師著威勝不行於強暴而行於寡弱也

汪氏曰荀吳首伐鮮虞以其挾詐故夷之此非詐襲故稱將稱

以著其暴耳

五年冬晉士鞅帥師圍鮮虞

許氏曰晉以土地之故縱兵橫加鮮虞而不能服則又圍之兵

益忿義益不勝君子是以惡晉也

哀公六年春晉趙鞅伐鮮虞

杜氏曰四伐鮮虞納荀寅於柏人

薛氏曰昭十二年楚人伐徐之歲楚處方熾而書晉伐鮮虞十

五年楚寇少安不能輯睦中夏而荀吳伐鮮虞定四年召陵罷

會林之有可乘之機而士鞅伐鮮虞五年吳方入郢士鞅又伐

鮮虞於是盡失諸侯又有趙鞅之伐則晉伯業之衰皆由陪臣

封殖貪伐鮮虞故也

路史曰鮮虞本子姓國

晉語有蒲人翟人中行穆子伐翟翟鮮虞也列子云趙襄子攻翟取左人中人未嘗滅也應劭地理記中人城西北四十里有左人城左人之故邑左人即今定之唐縣

卮言曰鮮虞在春秋時未甚微也春秋書晉四伐鮮虞而不能克傳云鮮虞嘗敗晉師是時晉雖不競權臣擅命取地自封何有一邑而鮮虞能屢抗之庶幾與強國埒矣路史以鮮虞為翟人地在定州而武王成王之子俱有翟地各不同豈周初夷狄之入據中土者大槩滅之以封子弟而遂因其本號或其後代屢遷而不改耶是翟人其名號而鮮虞其國都矣鮮虞即中山也傳註人亦以為二蓋其地既異亦前後殊稱如殷商之類耳

今系之左

中山附

史記趙世家曰趙獻侯十年周威烈王十二年中山武公初立

徐廣曰中山武公西周桓公之子桓公者考王弟而定王子

金氏曰大事記曰按左傳昭公十二年八月晉荀吳假道於鮮

虞滅肥是冬晉復伐鮮虞杜預曰鮮虞白狄別種在中山新市

縣中山名見於傳蓋始於此及定公四年晉合諸侯於召陵謀

為蔡伐楚荀寅曰諸侯方貳中山不服無損於楚而失中山不

如辭蔡侯則中山是時勢已漸強能為晉之輕重矣史記趙世

家是年書中山武公初立意者其勢益強遂建國備諸侯之制

與諸夏抗歟索隱曰中山古鮮虞國姬姓也而徐廣曰中山武

公周定王之孫西周桓公之子古史謂周衰已甚安能使子弟據中山乎其說是也或者徐廣徒聞中山姬姓遂傳會其世系歟

會編威烈王十八年晉魏斯擊宋使樂羊伐中山克之使其子擊守中山

外紀曰魏文侯嘗借道於趙攻中山趙不許趙利曰魏攻中山而不能取則魏罷而趙重魏拔中山必不能越趙而守是用兵者魏而得地者趙也君不如許之彼知君利之心將輟行君不如借之道而示不得已也

大事記曰按史記戰國策韓詩外傳古史樂羊攻中山其子在中山執之以示羊羊不顧中山烹而為之羹羊啜之盡一盃中山知其忍下之文侯賞其功而疑其心文侯愛少子摯使太子

擊守中山趙倉唐傳之居二年往來之使不通倉唐使于文侯以詩諷之文侯乃出少子摯封之中山而復太子擊

見說苑

通鑑曰文侯伐中山克之以封其子擊他日問於群臣曰我何如王皆曰仁君任座曰君得中山不以封君之弟而以封君之子何謂仁君文侯怒座趨出次問翟璜對曰仁君也文侯曰何以知之對曰君仁則臣直嚮者任座之言直是以知之文侯悅使璜召座而反之親下堂迎之以為上客

史記趙敬侯十年

周安王二十五年

與中山戰于房子十一年魏韓趙共滅

晉分其地伐中山又戰於中人趙成侯六年

周烈王七年

中山築長城

大事記曰文侯子武侯之世趙世家書與中山戰于房子是時

蓋已復國其後與諸國並稱王則其勢又強矣意者若鄭莊公  
克許雖有其地而不絕其祀所以能復興歟索隱之說亦然  
金氏曰按魏之攻中山也趙利已策其不能越趙而守之趙可  
以得地魏文侯亦豈不能察此故雖利其地以封其子亦必存  
中山以示趙而固子也此異時中山所以復興與

會編顯王四十六年戊戌中山君稱王

國策曰中山與燕趙爲王齊閉關不通中山之使其言曰我萬  
乘之國也中山百乘之國也何佯名於我欲割平邑以賂燕趙  
出兵以攻中山藍諸君患之張登曰請令燕趙固輔中山而成  
其王事遂定監諸君曰善遣張登徃王事遂定

史記趙武靈王十九年王北畧中山之地至於房子遂之代二十  
年王畧中山地至寧陵二十一年攻中山中山獻四邑和王許之  
罷兵二十三年攻中山二十六年復攻中山二十七年傳國於少  
子何是爲惠文王二年趙滅中山遷其王於膚施

綱目赧王十年丙辰趙伐中山取數邑中山復獻四邑以和

庚申趙伐中山中山君奔齊二十年丙寅趙中山

鮑氏國策註曰中山漢爲國者盧奴北平北新城唐深澤若涇  
安國曲逆望都新市按中山今保定真定二府盧奴今永平府  
路史曰釋地云鮮虞地中山國治盧奴佑云常山靈壽中山國有  
故城在西北張曜中山記云郡謂中人城城中有山故號中山其  
山仄而歛上若委粟漢中山靖王始移郡出山居盧奴隨經云中  
山城在今唐昌東北三十中山故城是中山故宮在安喜釣臺戲

馬

綱目集覽曰中山春秋曰狄地戰國為中山國後改定州今中山府是屬真定

綱目質實曰中山古狄都也春秋時屬晉戰國時屬魏後屬秦漢初為中山郡後改中山國曹魏改定州晉慕容垂都此隋改博陵郡唐初改定州後復為博陵郡尋更為義武軍節度宋陞為中山府金元因之本朝改為真定州屬真定府

肥

左傳昭公十二年傳晉荀吳偽會齊師者假道於鮮虞遂入晉陽八月滅肥以肥子緜臯歸

路史曰肥本自翟地晉滅之真定之肥纍城也在藁城西南七里肥子後歸燕封之肥如今年之盧龍梁惠王八年伐邯鄲取肥也道東是也晉太康八年立肥鄉縣隸廣平今年之盧龍或作邯鄲有故肥鄉縣城

昔陽

寰宇記曰鮮虞在北昔陽在南晉恐肥為備故從北偽東南行往會齊師乃先還假道鮮虞遂入昔陽也

路史曰肥子後遷昔陽今平定之樂平東五十里有昔陽故城故鉅鹿境一曰夕陽隋開皇中于下曲陽置昔陽今和之鼓城

鼓

左傳昭公十五年秋荀吳帥師伐鮮虞圍鼓鼓人或請以城叛穆子弗許三月鼓人或請降使其民見曰猶有食色姑修而城鼓人

告食竭力盡而後取之克鼓而反不戮一人以鼓子戴鞬歸

國語曰中行伯既克鼓白翟別邑以鼓子宛支來傳作令鼓人各復其

所察勿從鼓子之臣曰夙沙釐以其孳行軍吏執之辭曰我君是

事非事王也名曰君臣豈曰土臣今君實遷臣何賴於鼓穆子吳

召之曰鼓有君矣已使涉它守之爾止事君吾定而汝祿爵對曰臣委質

於翟之鼓未委質於晉之鼓也臣聞之委質為臣無有二心委質

而策歾委質於君書名於策示必死古之法也君有烈名臣無畔質敢即私利

以煩司寇而亂舊法其若不虞何穆子嘆而謂其左右曰吾何德

之務而有是臣也乃使行既獻獻功言於頃公與鼓子田於河陰使

夙沙釐相之

路史曰祈之鼓城唐屬定州有鼓聚在定之藁城





